

## LA CARTA DEL APOSTOL SAN PABLO A LOS ROMANOS

Pablo ja piada tunca quimisha ejaitiana quirica cuana deretaidha tsapiapiati Diusu sa dharejiji cuana sa puji. Ye quirica Roma ejude su aniji edue dharejiji cuana sa puji deretaidha. Ye quirica su Pablo quisa epuani Diusu peje su jei pu putsu bahui, ecuaneda d'oji su pu cua. Aimue jacuat-siasiati cuana jepuiti mahue.

Daja huecha ecuana ebametani Diusu sa ebia su jaibunebati cuana pamapa cristiano juchaji cuana sa puji. Cuaja tuahueda mesa Ebacua Jesucristo jepuiti ecuana d'oji su yatani ecuana ebuet-suatani. Daja huecha cuaja ecuaneseda tu butse su saida, butsepi puniuneti taji ebuet-suatani.

Ye versículo cuana da ebia su saida quita ebuet-suati puji:

1.16  
3.23  
5.8-12  
6.8,11,23  
8.1,14,18,28,35-39  
12.1,21  
15.3

*Pablo ja Roma ejude su aniji dharejiji edue cuana quirica tiametana*

<sup>1</sup> Ema da Pablo. Jesucristo sa emebajaji da ema. Diusu ja ema huaratiatana Jesús sa apóstol epu puji. Ema dharetana tusa quisa saida cuana quisaquisa epu puji. <sup>2</sup> Biahua tiempo da Diusu

ja mesa profeta cuana mesa quisa saida cuana quisamepirutaidha. Deremetaidha huecuana tusa quirica su cuaja tuahueda mesa Ebacua cristiano cuana peje su beitunge ya. <sup>3</sup> Tusa Ebacua Jesucristo jepuiti quisa saida cuana deremetaidha huecuana. Tueda deja bataji puana ye mundo su echua puji David chenu sa familia jenetia. <sup>4</sup> Tueda da Diosu sa Ebacua tucheda epuani. Cristiano cuana ja tueda manuametana biame, Espíritu Santo tucheda ja tueda manujiji cuana duju jenetia netianametaibana. Da neje Jesús da Diosu sa Ebacua bametana. Tueda quitaita da ecuana sa Echua Puji beju. <sup>5</sup> Tuahueda ema ebia su ibuneda ebatani putsu, ema huaratiatana tusa apóstol epu puji, tusa quisa saida cuana quisaquisa eputi puji, pamapa yahua cuana je pamapa cristiano cuana tu peje su jei paputa puji. <sup>6</sup> Beju micuaneda di Jesucristo peje su jei puana putsu, Diosu ja micuana dharetana Cristo sa epu puji.

<sup>7</sup> Edue cuana, micuaneda Roma ejude su aniji cuana, yama ye quirica ebeituinia. Diosu ja micuana dharetana mesa cristiano butsepi cuana epu puji, micuana ebia su ibuneda ebatani putsu. Diosu, Echua Puji Jesucristo detse ja ebia su meibunebataque. Tuatseda menimepijajametaque.

*Pablo Roma ejude su aniji dharejiji edue cuana peretija puana*

<sup>8</sup> Beju yama Jesucristo jepuiti Diosu diusulupai yainia, micuaneda tu peje su jubida enimetucheatiani putsu. Pamapa yahua cuana je pamapa edue cuana bahue epupirutani, cuaja micuaneda Diosu peje su ebia su enimetucheatiani nime. <sup>9</sup> Yama

Diusu pamapa muesumu neje emebajainia tusa Cristo jepuiti quisa saida cuana quisaquisa epu puji. Beju tueda bahue ema ene quita emimiani. Yama pamapa hora su tueda ebajainia micuaneseda puji. <sup>10</sup> Cua biame ema micuana baja putsu, yama Diusu jubida ebajainia ema d'oji patiata micuana ebati puji. <sup>11-12</sup> Yama micuana jabuetsuati neje tsahuaja micuaneda Diusu peje su jubida enimetuchteati puji. Yama micuana batija ecuaneda huamahuama Diusu peje su enimetuchteati puji. Quema puji di saida micuana sa Cristo jepuiti quisa saida cuana eid'aba puji. <sup>13</sup> Edue cuana, bahue mepuque, quejucua nuati biame ema micuana peje su putija pudhaana. Yama micuana Diusu sa mimi cuana ebia su buetsuaja yainia micuana sa saida puji. Cuaja yama pia edue cuana pia yahua cuana je buetsuana batame, daja huecha micuana yama buetsuaja yainia. <sup>14</sup> Beju pamapa cristiano cuana peje su Diusu sa quisa saida cuana quema quisaquisa pu taji epuani. Bahue eni cuana peje su ahua bue mahue cuana peje su quema quisaquisa pu taji epuani. Pamapa ye mundo sa cristiano cuana peje su Diusu sa quisa saida cuana quema quisaquisa pu taji epuani. <sup>15</sup> Pamapa micuaneda Roma ejude su aniji cuana peje su di ema quisaquisa putija epuani.

*Diusu sa quisa saida cuana da tucheda eni*

<sup>16</sup> Aimue quema bidhu Cristo jepuiti Diusu sa quisa saida cuana quisaquisa epu puji. Tueda quisa saida cuana da tucheda eni cristiano cuana d'oji su ya puji. Ahua quebata Diusu sa quisa

saida cuana su jei epu su, tueda Diusu ja d'ejí su yatayu. Tueda Cristo jepuiti quisa saida cuana Diusu ja equene judío cuana quisamepirutana d'ejí su paputa huecuana puji. Beju jiahue mu pamapa pia yahua cuana su aniji cristiano cuana peje su di tueda quisa saida cuana quisaquisa yametani tuneda di d'ejí su paputa puji. <sup>17</sup> Pamapa Cristo peje su enimetuheatiani cuana Diusu ja enimebutsepiata. Daja hue Diusu peje su enimetuheaderatita huecuana. Beju uja derejiji yani Diusu sa quirica su: “Ahua quebata Diusu peje su enimetuheatiani su, tueda Diusu ja enimebutsepiatayu. Tu neje eid'e yanienitiyu.”

### *Pamapa cristiano cuana da juchaji*

<sup>18</sup> Beju Diusu sa castigo cielo jenetia tipeida ecuina deja madhada cuana peje su, Diusu sa quisa saida cuana eichaderatani huecuana putsu. Jucha bahui ebia su mecuana sa tsada putsu, aimue Diusu sa quisa saida cuana id'abaja mahue yatani huecuana. Da putsu, Diusu ja jubida ecastigata huecuana. <sup>19</sup> Diusu da tu jepuiti ai cuana tuna peje su jabamesaisiatiana biame, aimue eiyubatani huecuana mahue. <sup>20</sup> Diusu ja tucheda eni jabamesaisiatiana, pamapa ai cuana ataidha putsu. Pamapa cristiano cuana ja beju Diusu eid'e eni, tucheda ebatani, tuahueda ye mundo pamapa ataidha putsu. Da putsu, pamapa tu peje su jei puja mahue cristiano cuana tu butse su juchaji eputa, aimue tu peje su jei puja mahue putana huecuana putsu. <sup>21</sup> Diusu yani bahue eputani huecuana biame, aimue tueda eiyubatani huecuana mahue. Daja

huecha aimue Diusu diusulupai yatani huecuana mahue. Beju epitsapitsatitani huecuana Diusu jepuiti. Aimue Diusu eshanapatani huecuana mahue. <sup>22</sup> Bahue eni ebatitani biame, aimue bahueta mahue. <sup>23</sup> Diusu eid'e eni deja eimea su turucatana huecuana emitsutsua puji. Daja huecha animalo eimea cuana su. D'ia cuana, pushi tame cuana, etsedu neje aseji cuana eimea cuana yatani huecuana emitsutsua puji, aimue tueda ai cuana ja etsahuatani mahue huecuana biame.

<sup>24</sup> Da putsu, Diusu ja nahuerijitana huecuana pamapa tuna sa ai utsatada madhada cuana paata huecuana puji. Tuneda cama equita cama neje pamapa ai madhada adhida cuana yatani. <sup>25</sup> Aimue Diusu jepuiti jabuetsuati eni cuana jei puja eputani huecuana mahue. Bid'umimi jabuetsuati cuana bahui jei eputani huecuana. Aimue Diusu quitaita iyuda neje mitsutsuaja yatani huecuana mahue. Tusa ai jaichati cuana bahui emitsutsuatani huecuana. Aimue Diusu sa ai jaichati cuana mitsutsua taji mahue biame, daja yatani huecuana. Diusu quitaita mecuana sa mitsutsuaeni taji yatani huecuana, tuahueda pamapa ai cuana ataidha putsu. Beju gloria Tata Diusu, tuahueda pamapa ai cuana ataidha putsu. Daja papu.

<sup>26</sup> Da putsu, Diusu ja nahuerijitana huecuana, aimue tueda mitsutsuaja yatani huecuana mahue putsu. Daja atana huecuana beju pamapa mecuana sa ai utsatada madhada cuana paata huecuana puji. Epuna cuana, pia epuna neje pamapa ai utsatada madhada adhida cuana

yatani equita cuana neje. <sup>27</sup> Daja huecha deja cuana di pia deja cuana neje pamapa ai utsatada madhada adhida cuana yatani equita cuana neje. Tuneda cama ai bidhutada cuana yatani. Aimue epuna tsada mahue ta huecuana. Da putsu, tuna mehua emadhatitani, tueda jucha madhada cuana a putsu.

<sup>28</sup> Diosu shanapaja mahue yatani huecuana putsu, Diosu ja nahuerijitana huecuana pamapa tuna sa ai madhada piba cuana paata huecuana puji. Da su beju tuneda pamapa ai piba madhada cuana neje daja hue edusuderatitani. <sup>29</sup> Pamapa ai madhada, ai utsatada madhada adhida cuana yatani huecuana. Pia sa ai cuana eutsabatani huecuana. Envidia cama neje edusutitani. Deja manuameji, ate, icheiche aida ta huecuana. Cristiano cuana baseaji, pia cuana banirireji, nimemadhada ta huecuana. <sup>30</sup> Pia cristiano cuana sa mimi madhada puji, Diosu duinibaji, jaiyubati bue mahue, ai madhada pibaji bahui ta huecuana. Tuneda cama ebia su aida ebatitani. Aimue tuna sa tata, cuara jei aja mahue yatani huecuana. <sup>31</sup> Bue mahue, jamitsuti ape bue mahue, edue quitaita ibuneda mahue, japerdonati bue mahue, jabataichenubati bue mahue ta huecuana. <sup>32</sup> Beju bahue ta huecuana tueda ai madhada cuana a bahue cristiano cuana Diosu ja cuati castigo su ebeitutayu ecastigata huecuana puji. Bahue ta huecuana biame, tueda ai madhada cuana daja hue ebia su yatani huecuana. Beidaji eputani huecuana, pia cuana tuna nime daja huecha ai madhada cuana yatani ba putsu.

## 2

### *Diusu ja cristiano cuana butsepi ejuzgata*

<sup>1</sup> Be pia cristiano cuana mejuzgaji.

Micuaneda da tuna nime juchaji putsu, aimue micuaneseda juzga taji huecuana mahue. Micuaneda da tuna nime daja hue ai madhada cuana yainia putsu, micuaneda quitaita ejuzgatiani pu cua nime. <sup>2</sup> Beju bahue ecuaneda Diusu ja tueda ai madhada aji cristiano cuana ematsetayu, tueda da butsepi putsu. <sup>3</sup> Tueda ai cuana da madhada hue micuaneda eshanapainia biame, ahua micuaneda di tueda ai madhada cuana ya su, ¿aimue jia maida micuana Diusu ja ematseta mahue? <sup>4</sup> Beju Diusu ja paciencia neje juchaji cuana ebia su ibuneda ebatani putsu, aimue tipeida ematsetani huecuana mahue tu peje su papibaturucatita huecuana puji. Da putsu, mipibaturucatique Diusu peje su. Be uja mepibatiji: “Diusu ja ema ebia su ibuneda ebatani putsu, aimue ema ematseta mahue.” <sup>5</sup> Ahua micuaneda Diusu peje su japibaturucatiya mahue su, Diusu ja micuana ematsetayu, mesa castigo tsine ecuina su. Da tsine su Diusu ja pamapa cristiano cuana butsepi neje ejuzgata. Tu peje su muesumu tadada cuana jubida ematsetayu, tu epueicha su. <sup>6</sup> Diusu ja pamapa cristiano cuana ejuzgata cuaja ai atana huecuana. Diusu ja ejuzgata huecuana, cuaja ai saida ahua ai madhada atana huecuana batame. <sup>7</sup> Pamapa cristiano cuana Diusu ja eturuca etiatayu, cuaja ye mundo su anime putana batame. Ahua quebata cuana sa Diusu tuna jepuiti saida pamimi tsada

su, ahua tu neje cielo su anienitija huecuana su, da su Diusu ja eid'e yameenitayu huecuana. <sup>8</sup> Tusa jabuetsuati aja atana mahue cuana mu jubida neje ematsetayu tu epue hora su. Tuna neje ebia su eduinini, madhada neje cama epuniunetitani huecuana putsu. <sup>9</sup> Pamapa ai madhada yatani cristiano cuana Diusu ja sufri yametayu castigo su. <sup>10</sup> Daja huecha Diusu ja pamapa ai saida yatani cuana ebia su eibunebatayu. Enimepijajameta huecuana. Tuna jepuiti saida emimi.

<sup>11</sup> Beju Diusu ja pamapa cristiano cuana tupupai butsepi neje ejuzgata, cuaja ye mundo su yani tupu jadasutitana huecuana batame. <sup>12</sup> Tuahueda pamapa juchaji cuana ematsetayu. Judío mahue juchaji cuana Diusu sa jacuatsasiati derejiji mecuana sa yani mahue biame, Diusu ja ematseta huecuana. Daja huecha judío juchaji cuana di ematsetayu, mesa jacuatsasiati derejiji mecuana sa yani biame. <sup>13</sup> Ahua etse Diusu sa jacuatsasiati cuana id'aba putsu, yainia su, da su Diusu ja tueda nimebutsepi yatayu. Ahua id'aba putsu biame, etse aimue yainia mahue su, aimue Diusu ja tueda nimebutsepi yatayu mahue. <sup>14</sup> Ahua judío mahue cuana ja ai saida cuana yatani jacuatsasiati derejiji cuana mecuana sa yani mahue biame, da su tueda jacuatsasiati cuana yatani pu cua nime hue ta huecuana. <sup>15</sup> Diusu sa jacuatsasiati derejiji cuana mecuana sa yani mahue biame, bahueta huecuana saida ahua madhada hue yatani huecuana, Diusu ja mecuana sa muesumu su eshanapametani huecuana putsu. <sup>16</sup> Da putsu, Jesucristo ja pamapa cristiano cuana



tupupai ejuzgatayu, cuaja tuna sa ai ajiji cuana batame, saida ahua mahue. Daja yatayu, mesa castigo tsine ecuina su. Da tsine su pamapa mecuana sa ai etsia piba cuana ejuzgatayu. Daja yama cristiano cuana equisainia.

*Judío cuana ja Moisés sa jacuatsasiati aja yatani d'aji su epu puji*

<sup>17</sup> Beju jiahue yama micuana quisaja. Micuaneda judío putsu, ebia su aida ebatiani, Diusu ja mesa jacuatsasiati cuana micuana tiatana putsu. Micuaneda uja epuani: “Ecuanaju bahui da Diusu sa dharejiji cristiano cuana.”

<sup>18</sup> Bahue eni micuaneda pamapa Diusu sa jacuatsasiati cuana yanana jenetia. Da putsu, dhare bahue micuaneda ai saida cuana ya puji. Cuaja Diusu sa tsada micuaneseda a taji micuaneda a bahue. <sup>19-20</sup> Micuaneda Diusu sa jabuetsuati cuana ebuetsuaji cuana ebatiani. Pamapa Diusu sa ene quita jacuatsasiati derejiji cuana eshanapaenitani. Da putsu, micuaneda Diusu shanapaji mahue cuana Diusu jepuiti buetsuaja yadhaainia. Bue mahue cuana Diusu sa jacuatsasiati cuana buetsuaja yadhaainia. Yanana chidi cuana di buetsuaja adhaainia.

<sup>21</sup> Diusu sa jacuatsasiati cuana pia cristiano cuana ebuetsuainia biame, aimue micuaneda huecha tueda jacuatsasiati cuana yainia mahue. Pia cuana, be tsi puji mepuji, ebuetsuainia biame, micuaneda quitaita hue tsi epuani. <sup>22</sup> Be pia deja sa ehuané mequinaji pia cuana ebuetsuainia biame, micuaneda quitaita hue daja yainia. Be eimea cuana memitsutsuaji ebuetsuainia biame,

micuaneda quitaita hue chipilu Tata Diusu ebia su tsada ebainia. <sup>23</sup> Diusu sa jacuatsasiati derejiji cuana micuana sa yani biame, aimue tueda jacuatsasiati quitaita cuana yainia mahue. Micuaneda daja ba putsu, cristiano cuana ja Diusu tsada mahue ebatani. <sup>24</sup> Beju Diusu sa quirica su uja derejiji yani micuana jepuiti: “Micuana jepuiti Diusu shanapaji mahue cuana ja Diusu emadhabatani.”

<sup>25</sup> Judío mu mepu. Tueda mu saipie hue, ahua Diusu sa jacuatsasiati derejiji cuana yainia su. Quebata judío ja mesa jacuatsasiati derejiji yani biame, ahua aimue yatani mahue su, da su tueda Diusu shanapaji mahue pu cua nime. <sup>26</sup> Quebata judío mahue ja mu mesa jacuatsasiati derejiji yani mahue biame, ahua tueda jacuatsasiati cuana yatani su, tueda da judío pu cua nime Diusu sa dharejiji epu. <sup>27</sup> Beju tueda da Diusu butse su saida, nimebutsepi epu judío mahue epuani biame, jacuatsasiati cuana yatani putsu. Daja huecha micuaneda judío cuana mu Diusu butse su aimue nimebutsepi epu mahue judío quitaita biame, jacuatsasiati cuana mue a putsu. Micuaneseda jacuatsasiati derejiji cuana yani biame, aimue Diusu butse su nimebutsepi epu mahue, tueda jacuatsasiati cuana mue ape putsu. <sup>28</sup> Aimue tupu mahue, judío bahui pu putsu, nimebutsepi epu puji. <sup>29</sup> Pamapa Diusu sa ene quita cristiano cuana ebametitani tuna sa piba eichacua jepuiti, aimue ai puiti cuana a putsu mahue. Tuna sa tsada Diusu beidaji yame puji bahui. Diusu sa mahue cuana ja mu jacuatsasiati cuana yatani cristiano cuana bahui beidaji yame

puji.

### 3

<sup>1</sup> Da su, ¿a da saida judío epu puji?

<sup>2</sup> Ehe, saida da, tueda saida eni putsu. Equene Diusu ja judío cuana mesa jacuatsasiati cuana menajatiataidha. <sup>3</sup> Piada piada tuneda Diusu tije aja ataidha mahue biame, Diusu ja mesa jamitsuti cuana tuna neje apetaidha. <sup>4</sup> Arijiija mahue ataidha mesa jamitsuti tuna neje, tuneda daja biame. Pamapa cristiano cuana da bid'umimi puji biame, tueda mu butsepi. Uja derejiji yani Diusu sa quirica su:

Diusu, mique mimi cuana da butsepi.

Aimue detse mida bid'umimi puji aiya biame tu-aquisata cua mahue.

<sup>5</sup> Beju cuapuitime piada piada cuana uja pu cua: “Saipie hue ecuanaju jucha ya puji. Aimue butsepi mahue Diusu ja ecuana ecastigata puji. Ecuana sa jucha jepuiti Diusu butsepi ebametiani. Ahua ecuaneda jucha ya mahue su, ¿cuaja ni da ecuaneda Diusu da butsepi bahue pume pu cua? Da su saipie hue ecuaneda jucha ya puji Diusu da butsepi pabameti puji.” <sup>6</sup> Be daja mepibaji. Diusu ja pamapa jucha yatani cuana ejuzgatayu, tueda da butsepi putsu.

<sup>7-8</sup> Ahua ecuaneda jucha ya su, aimue tueda Diusu sa puji saida mahue. Cuapuitime etse uja pu cua: “Saipie hue ema bid'umimi epu puji. Yama bid'umimi a putsu, cristiano cuana ja Diusu da ene quita ebata. Da putsu, ema Diusu sa cuaja castiga taji mahue.” Beju aimue saida mahue daja epibati puji. Piada piada cuana yama pa ai madhada

cuana a taji ebuetsuainia Diusu butsepi ebame puji. Aimue daja yama cristiano cuana ebuet-suainia mahue, daja yama ebuetsuainia eputani huecuana biame. Beju Diusu ja jubida ematseta huecuana, daja eputani huecuana putsu.

*Pamapa su juchaji ta huecuana*

<sup>9</sup> ¿Ai judío cuana da pia cristiano cuana ebia su saida bata? Pamapa judío cuana, pamapa judío mahue cuana neje tupupai juchaji eputani Diusu butse su. <sup>10</sup> Beju uja derejiji yani Diusu sa quirica su:

Aimue aidhe biame nimebutsepi mahue.

<sup>11</sup> Aimue aiya biame Diusu eshanapatani mahue.

Aimue aiya biame Diusu tsada ebatani mahue.

<sup>12</sup> Pamapa su jeitid'ujiji eputaniuneti castigo su eputi teje.

Aimue aiya biame ai saida cuana yatani mahue.

<sup>13</sup> Tuna sa mimi cuana da adhida.

Jabaseati aida ta huecuana.

Tuna sa jabaseati mimi cuana da bacua sa jaati nime.

<sup>14</sup> Duinini mimi madhada cama emimitani huecuana.

<sup>15</sup> Jamanuameti aida cuana eputani huecuana.

<sup>16</sup> Quepia tuna eputitani su pia cuana sufri yametani huecuana.

<sup>17</sup> Nimepijaja bue mahue ta huecuana.

<sup>18</sup> Aimue Diusu eiyubatani huecuana mahue.

<sup>19</sup> Beju judío cuana bahue eputani Diusu ja ematsetayu huecuana, jacuatsasiati cuana ema su yanita putsu. Tueda jacuatsasiati ja uja ebuet-suatani: Diusu ja pamapa cristiano cuana emitanameta, tu butse su juchaji eputani huecuana

putsu. <sup>20</sup> Aimue cristiano cuana Diusu butse su nimebutsepi puta cua mahue, tueda jacuatsasiati cuana a putsu. Tueda jacuatsasiati quitaita ja pamapa cristiano cuana da juchaji ebuetsuatani.

*Janimetucheati jepuiti bahui Diusu ja ecuana nimebutsepiyatani*

<sup>21</sup> Beju jiahue Diusu ja ecuana ebuetsuatani cuaja ecuaneda d'eji su pu cua. Aimue jacuat-sasiati cuana jepuiti ecuana nimebutsepi yatani mahue. Jesucristo jepuiti mu ecuana nimebutsepi yatani. Biahua tiempo Moisés chenu, Diusu sa profeta chenu cuana tueda ai cuana jepuiti quisa putaidha. <sup>22</sup> Beju quebata judío ahua judío mahue cristiano cuana ahua Jesucristo peje su jei eputa su, Diusu ja d'eji su yata huecuana. <sup>23</sup> Pamapa cristiano cuana da Diusu butse su tupupai juchaji eputani. Tu butse su tsabaji mahue eputani mahue. <sup>24</sup> Daja biame, Diusu ja cha nimebutsepi ame hue yatani huecuana, Jesucristo jepuiti d'eji su yatani huecuana putsu. <sup>25</sup> Cristo jucha jepuiti curusu su manuana putsu, Diusu ja nimebutsepi yatani huecuana, ahua Cristo peje su jei eputa huecuana su. Daja Diusu ja yatani tueda da butsepi pashanapata huecuana puji. Biahua tiempo aimue Diusu ja pamapa juchaji cuana matsepetaidha mahue, tuna sa jucha cuana jepuiti Cristo curusu su emanu puji ebeituta shanapa putsu. <sup>26</sup> Biahua tiempo Diusu pacienciaji aidaji puidha juchaji cuana neje. Jiahue mu Cristo peje su jei eputani cuana Diusu ja nimebutsepi yatani. Daja a putsu, Diusu butsepi ebametiani.

<sup>27</sup> Aimue ecuaneda jacuatsasiati cuana a putsu, enimebutsepiatiani mahue. Diusu ja mu ecuana enimebutsepiatani, ecuaneda Cristo peje su jei epuani su. Da putsu, ecuaneseda cuaja aida jabati taji mahue, aimue ecuaneda janimebutsepiati cua mahue putsu. <sup>28</sup> Bahue ecuaneda quebata papu Cristo peje su jei epu su, Diusu ja tueda enimebutsepiata. Aimue tu mehua quitaita janimebutsepiatita cua mahue, jacuatsasiati cuana a putsu.

<sup>29</sup> Judío cuana Diusu tuneseda puji bahui pepe hue eputani. Beju aimue daja mahue. Tueda mu pamapa cristiano cuana sa Diusu. <sup>30</sup> Tuahueda pamapa cristiano cuana tupupai ebatani. Quebata papu nimebutsepi ata cua, ahua tu peje su jei epu su. <sup>31</sup> Cuapuitime piada piada micuaneda uja pu cua: “Diusu ja ema nimebutsepi atana, Cristo peje su jei puana putsu. Da su aimue quema jacuatsasiati cuana a taji mahue.” ¡Mahue! Be daja mepibatiji. Ebia su ecuaneseda jacuatsasiati cuana a taji, Diusu sa dharejiji cuana putsu.

## 4

### *Diusu ja Abraham nimebutsepi ataidha*

<sup>1</sup> Mepibaenitique cuaja ecuana sa tata

Abraham chenu Diusu neje anidha. <sup>2</sup> Aimue ai saida cuana ataidha putsu, Diusu ja tueda nimebutsepi ataidha mahue. Diusu ja Abraham chenu nimebutsepi ataidha, tueda tu peje su janime-tuheatidha putsu. Da putsu, Abraham chenu aimue aida jabatidha mahue Diusu butse su. <sup>3</sup> Uja derejiji yani Abraham chenu jepuiti: “Diusu ja Abraham chenu nimebutsepi ataidha, tueda

Diusu peje su janimetuheatidha putsu.” <sup>4</sup> Beju bahue quisa yama micuana equisa. Ahua etse emudumuduani su, mudu emetse sa etse chujetia taji, mudu puji mesa manu putsu. Daja huecha ahua aiya etse ai chidi cha tia hue yatani su, tueda da chuje mahue. Tusa jaibunebati jepuiti hue etse etiatani, manu mahue putsu. <sup>5</sup> Daja da Diusu. Aimue ecuaneda tuseda manu mahue. Tuahueda quebata juchaji papu saida ebatsuta, ahua tu peje su tueda jei epu su. Aimue ai saida cuana a putsu, Diusu ja tueda ebatsuta mahue. <sup>6</sup> Daja huecha echua puji David chenu mimidha tueda ai cuana jepuiti. Beidaji quebata Diusu ja ebatsuta tusa ai jaati cuana piba putsu mahue. <sup>7</sup> Uja echua puji David chenu puidha ye ai cuana jepuiti:

Ebia su beidaji eputani Diusu ja jucha perdonajiji cuana.

<sup>8</sup> Ebia su beidaji eputani Diusu ja nimebutsepi ebatani cuana.

<sup>9</sup> Diusu ja quebata papu eperdonatayu. Judío cuana ahua judío mahue cuana tupupai enimebutsepiatayu, ahua Diusu peje su jei eputa huecuana su, cuaja Abraham chenu tu peje su jei puidha nime. <sup>10</sup> Mepibaenitique Abraham chenu su. Diusu ja tueda nimebutsepi ataidha, tu peje su janimetuheatidha putsu. Tueda huitsanasiquiji mahue tsuhu puina su, Diusu ja tueda nimebutsepi ataidha, tu peje su janimetuheatidha putsu. <sup>11-12</sup> Da su Diusu ja nimebutsepi ataidha su chu, Abraham chenu jahuitsanasiquiti putsu, marcajiji puidha. Tueda marca ja Abraham chenu nimebutsepi bametaidha. Da jepuiti Abraham chenu pamapa huitsanasiquijiji mahue biame

nimebutsepi cuana sa tata pu cua nime. Tuneda Abraham chenu neje tupupai nimebutsepi ep-utani Diusu peje su janimetuheatitani jepuiti. Da putsu, Abraham chenu da pamapa Diusu peje su enimetuheatitani cuana sa tata pu cua nime, huitsanasiquijiji ahua mahue paputa huecuana biame.

*Janimetuheatitani jepuiti bahui Diusu ja mesa jamitsuti tiataidha*

<sup>13</sup> Diusu ja tu peje su enimetuheatitani cuana Abraham chenu neje tupupai ye mundo etia jamitsuti tiataidha. Aimue jacuatsasiati cuana apetaidha huecuana putsu, Diusu ja tueda jamitsuti tiataidha mahue. Daja jamitsuti tiataidha huecuana, tu peje su janimetuheatitaidha huecuana putsu. <sup>14</sup> Diusu ja tu peje su enimetuheatitani cuana bahui ye mundo etiata. Ahua jacuatsasiati aji cuana ye mundo etiata su, da su mesa jamitsuti cuana chuje mahue epu. Cristiano cuana sa Diusu peje su janimetuheatitani cuana daja huecha chuje mahue epu. <sup>15</sup> Ene putsu, jacuatsasiati cuana ja ecuana ematsetani. Jacuatsasiati cuana mahue pu cua su, daja huecha aimue Diusu ja matseta cua mahue, jucha mahue putsu.

<sup>16</sup> Da su Diusu ja ecuana mesa jamitsuti cuana cha tia hue yatani, ahua ecuaneda tu peje su enimetuheatitani su. Mesa jamitsuti cuana ecuana etiatayu mesa jaibunebati jepuiti, cuaja Abraham chenu tiataidha nime, ahua ecuaneda di Abraham chenu nime enimetuheatitani su, judío ahua judío mahue papu biame. Abraham chenu da pamapa Diusu peje su enimetuheatitani cuana sa tata pu



cua nime Diusu ja ichataidha. <sup>17</sup> Uja Diusu ja ataidha Abraham chenu mesa quirica su derejiji yani: “Yama mida dueji sa tata pu cua nime ichana.” Beju tueda jamitsuti da ene quita, Diusu quitaita daja puidha putsu. Tuada da manujiji cuana eid'emeyuji Diusu. Daja huecha ai cuaja epu cuana tuahueda jaitianajiji nime ebatani.

<sup>18-19</sup> Beju Sara chenu da jabacuati bue mahue puina biame, Abraham chenu Diusu peje su janimeid'uatidha. Abraham chenu da cien maraji beju puina su, Diusu ja tueda uja ataidha: “Mique ehuan Sara bacuaji epu, jabacuati bue mahue biame.” Tuatseda aimue jabacuati bue mahue puina biame, Abraham chenu Diusu peje su ebia su janimetuheatidha, Diusu ja tueda, dueji sa tata pu cua nime, ataidha su. Edhi, tucheda mahue tatse biame, Abraham chenu Diusu peje su jubida janimetuheatidha, Diusu ja mesa tu neje jamitsuti yapetayu. <sup>20</sup> Beju edhi quitaita biame, Abraham chenu daja hue ebia su Diusu peje su janimetuheaderatidha. Diusu diusulupai a putsu, mitsutsuataidha. <sup>21</sup> Daja Diusu ja tueda ebaqua tiata cua Abraham chenu jei puidha. <sup>22</sup> Da putsu, Diusu ja Abraham chenu nimebutsepi bataidha. <sup>23</sup> Diusu ja aimue Abraham chenu jepuiti bahui daja saida ataidha mahue. <sup>24</sup> Tueda ai cuana derejiji yani ecuana sa saida puji. Diusu ja ecuaneda di nimebutsepi yata, ahua tu peje su ecuaneda Abraham chenu janimetuheatidha nime, enimetuheatu su. Diusu quitaita ja ecuana sa Echua Puji Jesucristo manujiji cuana duju jenetia id'emetaibana. <sup>25</sup> Jesucristo manuana ecuana sa jucha cuana jepuiti. Daja huecha Diusu ja tueda

id'emetaibana ecuana nimebutsepi ya puji.

## 5

*Ecuana sa Diusu peje su janimetucheati cuana jepuiti ecuaneda Diusu peje su nimebutsepi epu*

<sup>1</sup> Ecuanaeda Cristo peje su janimetucheati putsu, Diusu ja ecuana nimebutsepi yatani. Da putsu, ecuaneda Diusu neje saida yani. <sup>2</sup> Ecuanaeda Cristo peje su janimetucheatiana putsu, Diusu ja ecuana ebia su ibunebatana. Jiahue ecuaneda mesa jaibunebati jepuiti saida epuniunetiani. Cristo neje ecuana dunemetana putsu, beidaji ecuaneda epuani, Diusu neje ecuaneda cielo su yanienitiyu putsu. Dapia ecuana pamapa mesa ai saida cuana etiata. <sup>3-4</sup> Beju jiahue ye mundo su ecuaneda Cristo jepuiti sufri epuani biame, beidaji ecuaneda, sufrimiento cuana ja ecuana paciencia aidaji yatani putsu. Paciencia neje pamapa ai cuana tuchea cua. Da su etucheatiani je, Diusu peje su ecuaneda jubida enimeid'uatiani. <sup>5</sup> Ecuanaeda tu peje su enimeid'uatiani putsu, aimue tuahueda ecuana ebaseata mahue. Espiritu Santo ecuana tiatana. Tueda Espiritu Santo ja Diusu ja ecuana ebia su ibuneda ebatani ecuana eshanapametani.

<sup>6</sup> Cuaja cristiano cuana d'oji su pu taji mahue eputani ba putsu, Diusu sa tsada hora su Cristo pueana juchaji cuana sa eturuca emanu puji. <sup>7</sup> Aimue etse pia eturuca manuja pu cua mahue. Daja biame, cuapuitime pia saida eturuca etse manuja pu cua. <sup>8</sup> Beju Cristo mu ecuaneda eturuca manuana, ecuaneda juchaji biame. Da

neje Diusu ja ecuana ibuneda ebatani jabame-tiana. <sup>9</sup> Jesús ja mesa ami jad'uichatiana putsu, ecuana Diusu peje su nimebutsepi atana. Beju aimue tueda bahui mahue. Tuahueda ecuana Diusu sa epue castigo tsine jenetia d'oji su yatayu. <sup>10</sup> Ecuana Diusu neje equene jamajaitiana bi-ame, Diusu ja ecuana tu neje saida atana, mesa Ebacua Jesús manuana jepuiti. Beju aimue tueda bahui mahue. Ecuana tu neje saida pu putsu, tuahueda ecuana d'oji su yaenitayu, Cristo da eid'e yanieni putsu. <sup>11</sup> Da putsu, jahue ecuana ebia su beidaji, Diusu neje saida yani putsu, ecuana sa Echua Puji Jesucristo jepuiti.

*Adán chenu jepuiti ecuaneseda manu taji. Cristo jepuiti mu ecuana eid'e ameenita cua*

<sup>12</sup> Beju Adán chenu jepuiti jucha pupiruidha ye mundo su. Tueda jucha jepuiti pamapa cristiano cuana sa manu taji, juchaji huecuana putsu. <sup>13</sup> Moisés chenu sa jacuatsasiati derejiji cuana ai mahue tsuhu puina su, jucha ye mundo su anidha. Jacuatsasiati cuana anidha mahue putsu, aimue Diusu ja cristiano cuana matsetaidha mahue, jucha ataidha huecuana su. <sup>14</sup> Daja biame, Adán chenu jenetia Moisés chenu ja jacuatsasiati cuana tiataidha teje cristiano cuana manutaidha. Equene Adán chenu ja jucha ataidha nime, aimue ataidha huecuana mahue biame, manutaidha huecuana. Pamapa cristiano cuana sa manu taji Adán chenu ja Tata Diusu jei ataidha mahue jepuiti. Daja biame, cristiano cuana eid'e puenita cua, Cristo ja Tata Diusu jei ataidha jepuiti. <sup>15</sup> Beju Adán chenu da equene deja juchaji puidha. Tu

jepuiti cristiano cuana jucha pupiruidha. Da putsu, Adán chenu nime pamapa cristiano cuana sa manu taji jucha jepuiti. Jesucristo mu equene deja nimebutsepi, jucha mahue puina. Tu jepuiti jucuada cristiano cuana Diusu ja eperdonatayu, mesa jaibunebati da Adán chenu sa jucha madhaji quitaita ebia su aida, tucheda saida putsu. <sup>16</sup> Adán chenu piada sa jucha jepuiti cristiano cuana sa matsejiji putsu, manu taji. Cristo jepuiti mu Diusu ja dueji juchaji cuana cha d'eji su ame hue yatayu. Nimebutsepi yatayu huecuana. <sup>17</sup> Adán chenu quitaita sa jucha jepuiti pamapa cristiano cuana sa manu taji biame, Diusu ja cristiano cuana cha eid'e ameeni yata Jesucristo jepuiti. Diusu ja nimebutsepi yatani huecuana, Cristo peje su jei eputa huecuana su.

<sup>18</sup> Adán chenu ja jucha ataidha putsu, pamapa cristiano cuana sa matsejiji pu taji. Daja biame, Cristo curusu su manuana jepuiti, eid'e puenita cua huecuana, Diusu ja nimebutsepi yatani huecuana putsu. <sup>19</sup> Daja huecha Adán chenu ja Diusu jei ataidha mahue putsu, pamapa cristiano cuana da juchaji eputani. Daja biame, Cristo ja Tata Diusu jei atana putsu, dueji cristiano cuana nimebutsepi puta cua. <sup>20</sup> Beju Moisés chenu sa jacuatsasiati cuana ja cristiano cuana da juchaji ebametani. Da su cristiano cuana ebia su juchaji eputani biame, tuna neje Diusu sa jaibunebati cuana ebia su yani jucha cuana edhipa puji. <sup>21</sup> Equene jucha ja cristiano cuana manuametaina biame, jiahue Diusu sa jaibunebati cuana jepuiti cristiano cuana eid'e puenita cua. Beju Diusu ja nimebutsepi yatani huecuana, ahua Echua Puji

Jesucristo peje su jei eputa huecuana su.

## 6

*Ecuaneda eid'e, nimeeichacua Cristo neje dunejiji yani putsu, jucha mahue puniuneti taji*

<sup>1</sup> Beju juchaji cuana Diosu ja ebia su eibunebatani. ¿Ai daja putsu, ai ecuaneda jucha adera cua bata? <sup>2</sup> Aimue ecuaneseda jucha a taji mahue. Ecuaneda Cristo neje tupupai manuana pu cua nime putsu, aimue ecuaneseda jucha adera taji mahue. Da su, ¿ai ecuaneda jucha a cua bata, ecuaneda Cristo neje tupupai manujiji pu cua nime putsu? <sup>3</sup> ¿Bue mahue jia maida micuaneda pamapa ecuaneda Cristo neje dunejiji yani putsu, ecuaneda tu neje tupupai manuana pu cua nime? <sup>4</sup> Tu neje tupupai ecuaneda sepulcro su huananubiajiji pu cua nime, tu neje dunejiji putsu. Da su beju cuaja Diosu ja mesa tucheda neje Cristo id'emetaibana nime, daja ecuaneda di tu neje tupupai id'emetaibana pu cua nime. Da putsu, ecuaneseda jucha mahue puniuneti taji, Diosu ja ecuana nimeeichacua atana putsu.

<sup>5</sup> Diosu ja ecuana Cristo neje dunemetana. Tu neje tupupai curusu su ecuana manumetana pu cua nime. Beju curusu su ecuaneda manuana pu cua nime putsu, cuaja tueda id'eibana nime, daja ecuaneda di neicha eid'eyu. <sup>6</sup> Bahue ecuaneda Tata Diosu ja ecuana Cristo neje tupupai curusu su tatatana pu cua nime. Daja Diosu ja atana ecuana sa ai utsatada madhada cuana etaitanamepe puji. Da putsu, aimue ecuaneda jucha sa eme su yani mahue. <sup>7</sup> Beju ecuaneda

d'eji su jucha sa eme jenetia, curusu su Cristo neje tupupai manuana pu cua nime putsu. <sup>8</sup> Ahua ecuaneda daja tu neje tupupai curusu su manuana pu cua nime su, da su ecuaneda tu neje cielo su yanienitiyu. <sup>9</sup> Daja huecha Cristo id'eibana putsu, aimue detse beju neicha manu cua mahue, manuja aimue tueda pishitiata cua mahue beju putsu. <sup>10</sup> Tueda mu piada nuati hue manuana ecuana sa jucha cuana jepuiti. Id'eyu putsu, Diosu sa puji beju eid'e epuani. <sup>11</sup> Da su micuaneda ecuana sa Echua Puji Jesucristo neje dunejiji yani putsu, aimue micuaneseda jucha a taji mahue. Diosu sa puji bahui eid'e pu taji.

<sup>12</sup> Be mepishitiametiji jucha cuana neje. Be ai utsatada madhada cuana meaji. <sup>13</sup> Be equita neje jucha meaji, ai madhada cuana a putsu. Memenajatiatique Diosu peje su tusa ai saida cuana bahui ya puji, tuahueda micuana nimeeichacua, eid'e ametana putsu. <sup>14</sup> Beju aimue jucha ja micuana epishitiametani mahue, Diosu ja micuana d'eji su atana mesa jaibunebati cuana jepuiti. Da putsu, aimue jacuatsasiati cuana ja micuana matseta cua mahue.

*Cristo peje su jei eputani cuana da jucha sa eme jenetia d'eji su eputani*

<sup>15</sup> Edue cuana, bahue ecuaneda Diosu sa jacuatsasiati cuana ja jucha yatani cuana ematsetani. Daja biame, Diosu ja ecuana jacuatsasiati sa eme jenetia d'eji su atana mesa jaibunebati cuana jepuiti. ¿Ai daja putsu, ecuaneda jucha adera cua bata? <sup>16</sup> Bahue mepuque quebata ja emetse emebajata su, tueda da emetse sa eme su yani.

Daja huecha ahua micuaneda jucha yadera su, jucha sa eme su micuaneda yaniti. Ahua daja micuaneda ya su, micuaneda emanueni. Daja biame, ahua micuaneda Diusu jei ya su, micuaneda tu peje su nimebutsepi epu. <sup>17</sup> Beju yama diusulu-pai Tata Diusu yainia micuaneda equene jucha sa eme su anina jucha bahui ya puji biame, jiahue mu aimue daja mahue, micuaneda Diusu ja micuana tiatana jabuetsuati cuana jei ana putsu. <sup>18</sup> Beju Diusu ja micuana jucha sa eme jenetia d'eji su atana. Mesa eme su micuana ichatana ai saida, butsepi cuana bahui ya puji. <sup>19</sup> (Beju shanapata saida mimi cuana neje yama micuana equisainia, aimue micuaneda tueda ai cuana eshanapaeninia mahue putsu.) Edue cuana, cuaja equene micuaneda jucha sa eme su jamenajatiatiana nime ai madhada cuana bahui ya puji, daja jiahue Diusu peje su memenajatiatique mesa ai saida, butsepi cuana bahui ya puji. Daja a putsu, micuaneda da Diusu sa emebajaji saida cuana epu.

<sup>20</sup> Beju micuaneda jucha sa eme su puniunetina su, aimue ai butsepi cuana aja aina mahue. <sup>21</sup> ¿Ai puji saida ni da micuaneda tueda bidhutada ai madhada cuana aina? Tueda ai madhada cuana ja etse manu su bahui edusutani. <sup>22</sup> Beju jiahue Diusu ja micuana jucha sa eme jenetia d'eji su atana. Mesa eme su quitaita micuana ichatana micuaneda Diusu sa emebajaji saida epu puji. Daja a putsu, cielo su micuaneda eid'e yanienitiyu. <sup>23</sup> Jucha jepuiti pamapa cristiano cuana sa manu taji. Daja biame, Diusu ja cha eid'e ameeniyu yata huecuana, ahua ecuana sa Echua

Puji Jesucristo peje su jei eputa su.

## 7

*Cristo peje su jei eputani cuana da jacuatsasiati cuana sa eme jenetia d'ejji su eputani*

<sup>1</sup> Edue cuana, micuaneda Moisés chenu sa jacuatsasiati cuana eshanapainia. Tueda jacuatsasiati cuana da eid'e cuana sa puji bahui. Aimue manujiji cuana sa puji mahue. <sup>2</sup> Daja huecha butseji cuana. Epuna ahueji sa yahue neje ani taji yahue emanu teje. Ahua yahue emanu su, da su epuna d'ejji su epu pia deja neje yahueti puji. <sup>3</sup> Ahua tueda epuna mesa yahue eid'e biame, pia deja neje equinati su, jucha aida epu jacuatsasiati butse su. Ahua mesa yahue emanu su, ahua pia deja neje yahueti su, da su beju aimue jucha aida epu mahue jacuatsasiati butse su.

<sup>4</sup> Edue cuana, daja huecha micuaneda. Cristo neje tupupai micuaneda curusu su manuana pu cua nime putsu, da su d'ejji su epuani jacuatsasiati cuana sa eme jenetia. Micuaneda beju Cristo sa puji. Cristo eid'e pujiji neje dunejiji yani Diusu sa ai saida cuana bahui ya puji. <sup>5</sup> Ecuana equene Cristo shanapaji mahue su, jacuatsasiati cuana sa eme su anina su, pamapa ai utsatada madhada cuana aina. Tueda ai madhada cuana ja ecuana emanu su dusutaina. <sup>6</sup> Jiahue mu aimue ecuana jacuatsasiati cuana sa eme su yani mahue, Cristo neje tupupai ecuana manuana pu cua nime putsu. Aimue jiahue ecuana Diusu emebajainia mahue, jacuatsasiati edhi cuana a putsu. Jiahue



mu ecuaneda nimeeichacua, eid'e putsu, Espíritu Santo sa tucheda neje Diosu emebajainia.

### *Jucha ja ema emadhatani*

<sup>7</sup> Edue cuana, aimue ema jacuatsasiati cuana madhada hue epuani su mahue. Tueda jacuatsasiati cuana da saida, butsepi, ecuaneda juchaji eshanapametani putsu. Beju piada jabahuequisati yama micuana etia. Uja Diosu sa jacuatsasiati epuani: “Pia sa ai cuana be utsatabaji.” Ahua daja yama eutsataba su, da su ema juchaji epu. Ahua tueda jacuatsasiati aimue pu cua su, da su, ¿ai yama shanapa cua bata, ema jucha epuani, ahua mahue? <sup>8</sup> Yama jacuatsasiati cuana daja saida eshanapaeninia biame, daja hue jucha aja yainia. Ahua jacuatsasiati cuana aimue pu cua su, da su aimue ema juchaji pu cua mahue. <sup>9</sup> Beju yama jacuatsasiati cuana shanapaji mahue su, ema jucha mahue jabatiana. Jucha a putsu, aimue ema pibapibana mahue, jacuatsasiati cuana mue yama shanapa putsu. Tueda jacuatsasiati cuana yama beju shanapana su, ye chu ema juchaji jabatiana. Cuati castigo su quema puti taji yama shanapana, Diosu sa jacuatsasiati cuana mue yama ape putsu. <sup>10</sup> Tueda jacuatsasiati saida cuana da eid'e eni jaametiji biame, ema matsetana. <sup>11</sup> Jucha ja mu ema baseatana. Jacuatsasiati cuana da saida biame, ema ematsetani jucha jepuiti.

<sup>12</sup> Daja biame, jacuatsasiati cuana da saida, butsepi. <sup>13</sup> ¿Ai da, da su jacuatsasiati saida, butsepi cuana ja ema madhatiatana bata? Jucha ja mu

ema madhatiatana. Ema juchaji putsu, jacuat-sasiati cuana ja ema matsetana. Da su jacuat-sasiati cuana ja jucha cuana da ebia su madhada eni ecuana ebametani.

<sup>14</sup> Ema bahue Diusu sa jacuatsasiati cuana da saida, butsepi, Espíritu Santo ja tiatana putsu. Quema utsatada cuana mu madhada hue, ema jucha sa eme su yani putsu. <sup>15</sup> Mue shanapa cuaja su daja ema epuani. Yama ai saida cuana aja yainia biame, cuaja a taji mahue yama ebainia. Ai madhada cuana bahui yama atasaida ebainia ya puji, yama daja aja yainia mahue biame.

<sup>16</sup> Beju bahue ema yama yainia ai cuana da madhada hue. Daja huecha Diusu sa jacuatsasiati cuana saida, butsepi. Tueda jacuatsasiati cuana yama aimue yainia mahue putsu, ebia su ema epibapibani. <sup>17</sup> Beju cuaja pishitiame taji mahue yama ebainia jucha. Tueda jucha ja ema ai madhada cuana yametani. <sup>18-19</sup> Ema peje su mu mue ai saida biame yani mahue. Ai saida cuana aja yama yainia biame, cuaja a taji mahue yama ebainia. Ai madhada cuana yama aja mahue yainia biame, tueda bahui yama yainia. <sup>20</sup> Da su jucha ja mu ema daja ai madhada cuana yametani, aimue daja yama aja yainia mahue biame.

<sup>21</sup> Da su beju yama ai saida cuana aja yainia su, ai madhada cuana yainia. <sup>22-23</sup> Yama Diusu sa jacuatsasiati cuana pamapa muesumu neje aja yainia biame, quema equita sa utsatada madhada cuana ja ema pishitiame putsu, jucha sa eme su eichatani.

<sup>24</sup> ¡Aba ema! ¿Aiya jia ema d'eji su ata cua tueda manu su edusutani ai madhada cuana jenetia?

<sup>25</sup> Daja biame, yama Diosu diusulupai yainia, tuahueda bahui tueda ai madhada cuana jenetia ema d'oji su atana putsu, Echua Puji Jesucristo jepuiti. Da su Diosu sa ai tsada cuana bahui ebia su yama aja yainia biame, quema equita sa ai utsatada madhada cuana ja ema jucha ameja yatani.

## 8

### *Espíritu Santo sa tucheda neje puniuneti taji*

<sup>1-4</sup> Da su beju aimue Diosu ja

Cristo neje dunejiji yani cuana ematsetayu mahue. Eid'e jaametiji Espíritu Santo ja ema manu jenetia d'oji su atana. Daja huecha jucha sa eme jenetia ema Cristo neje dunejiji yani putsu. Jacuatsasiati cuana ecuaneda cuaja a taji mahue ebainia, jucha sa eme su yani putsu. Daja biame, Diosu ja mu ecuanada d'oji su atana. Mesa Ebacua Jesucristo beitutana ye mundo su deja equita pu putsu, ecuanada sa jucha jepuiti emanu puji. Da su Cristo manuana putsu, Diosu ja ecuanada jucha sa eme jenetia d'oji su atana. Jiahue ecuaneda Diosu sa jacuatsasiati cuana a cua, ahua Espíritu Santo neje ecuaneda epuniuneti su, ahua ai utsatada madhada cuana ecuanada ya mahue su.

<sup>5</sup> Quebata cuana ja mesa ai utsatada madhada cuana bahui aja yatani su, da huapiba bahui eputani. Daja huecha quebata cuana Espíritu Santo neje epuniunetitani su, ai saida cuana huapiba bahui eputani. <sup>6</sup> Quebata cuana tueda ai madhada cuana huapiba bahui eputa su, emanu-enita huecuana. Daja huecha quebata cuana

Espíritu Santo sa ai cuana huapiba bahui eputa su, Diusu ja eid'e ameeni putsu, enimepijajametaryu huecuana. <sup>7-8</sup> Beju quebata cuana ai utsatada madhada cuana huapiba bahui eputa su, Diusu neje emajaititani huecuana. Aimue Diusu sa jacuatsasiati saida cuana aja yatani huecuana mahue. Tueda jacuatsasiati cuana aimue cuaja a taji mahue ebatani, Diusu neje emajaitiani putsu. Aimue Diusu beidaji ameta cua huecuana mahue.

<sup>9</sup> Edue cuana, aimue micuaneda mu micuana sa ai utsatada madhada cuana sa eme su yani mahue. Micuaneda da nimeeichacua, Espíritu Santo neje epuniunetiani putsu. Quebata sa aimue Espíritu Santo mesa muesumu su yani mahue su, aimue tueda Cristo sa puji mahue. <sup>10</sup> Micuana sa equita cuana jucha jepuiti emanu biame, micuana sa enid'u eid'e epu, Diusu ja micuana Cristo jepuiti nimebutsepí atana putsu, daja huecha Cristo micuana sa muesumu su yani putsu. <sup>11</sup> Cuaja Diusu, Espíritu Santo detse ja Jesús manujiji cuana duju jenetia id'emetaibana nime, daja micuana sa equita cuana manujiji biame neicha eid'e yameenitayu, Espíritu Santo micuana sa muesumu su yani putsu.

<sup>12</sup> Da su edue cuana, aimue ecuana sa ai utsatada madhada cuana a taji mahue. <sup>13</sup> Ahua micuaneda tueda ai utsatada madhada cuana bahui ya su, micuaneda emanueni. Ahua micuaneda Espíritu Santo sa tucheda neje tueda ai utsatada madhada cuana epishitiame su, micuaneda eid'e epueni.

<sup>14</sup> Pamapa Espíritu Santo ja ehuidusutani cuana da Diusu sa ebacua cuana. <sup>15</sup> Edue cuana, cuaja

esclavo cuana emetse butse su iyuame neje puni-  
unetitana nime, daja micuaneda equene puni-  
unetina Diusu butse su. Jiahue beju be iyuame  
mepuji equene micuaneda puina nime su, Diusu  
ja micuana mesa Espiritu Santo tucheda tiatana  
putsu. Tueda Espiritu ja ecuana Diusu sa ebacua  
quitaita cuana atana. Jiahue ecuana Diusu,  
“Tata”, yametani. <sup>16</sup> Tuahueda quitaita ecuana  
eshanapameenitani ecuaneda Diusu sa ebacua  
cuana. <sup>17</sup> Tueda ecuana sa Tata putsu, pamapa  
tusa ai cuana ecuaneseda cama. Diusu ja mesa  
Ebacua Jesucristo etiatani ai cuana da ecuaneseda  
di epuani, ecuaneda Cristo neje dunejiji yani  
putsu. Ahua ecuaneda Cristo neje cielo su anien-  
itija su, ahua tu neje ecuatsasia puja su, da su  
mundo su tu sufri puana nime ecuaneseda di sufri  
pu taji.

<sup>18</sup> Edue cuana, ema epibatiani, ecuaneda  
cielo su ecuinati su, ye mundo sa sufrimiento  
cuana mue ai biame pu cua nime epu, dapia  
ecuaneda Diusu neje ebia su beidaji epueni putsu.  
<sup>19</sup> Pamapa Diusu ja ai ataidha cuana ja cuaja  
pamapa ai cuana eichacua yatayu eid'uatani,  
mesa ebacua cuana enetianamepetayu tsine su.  
Da tsine su Diusu ja pamapa mesa ai ataidha  
cuana di neicha eichacua yatayu. <sup>20</sup> Pamapa  
Diusu ja ai ataidha cuana Diusu ja matsetaidha  
jucha jepuiti. Daja biame, janimeid'uati cuana  
tiatana. <sup>21</sup> Diusu ja pamapa mesa ebacua cuana  
enetianametayu tsine su pamapa ai ataidha  
cuana di d'eji su eichacua yatayu. Pamapa  
mesa ebacua cuana yatayu nime, daja pamapa ai  
ataidha cuana ai madhada cuana jenetia d'eji su

eichacua yaenitayu. Da su pamapa su Diosu sa hueda su yanienititayu. <sup>22</sup> Bahue ecuaneda cuaja epuna nedaji puja epuani su, jubida enebatiani nime, daja ai ataidha cuana jubida enebatitani, d'ejí su eichacua puja putsu. <sup>23</sup> Ecuana di ai ataidha cuana nime ebia su eutsatabainia d'ejí su eichacua epu puji, Espíritu Santo ja ecuana eshanapametani putsu. Diosu ja ecuana equita eichacua tia putsu, ecuana cielo su mesa ebacua nime ebatsuta puji ecuaneda eid'uatiani. <sup>24-25</sup> Da puji ecuaneda daja hue Diosu peje su enimeid'uatiani. Beju ecuaneda jahue d'ejí su eni mahue tsuhu putsu, Diosu peje su ecuaneseda janimeid'uati taji, ecuana eid'emetayu teje. Da putsu, paciencia neje ecuaneda Diosu eid'uainia tuahueda ecuana d'ejí su yaenita puji.

<sup>26</sup> Edue cuana, ecuaneda nimepishihue biame, Espíritu Santo ecuana etsahuatani. Aimue ecuaneda Diosu mitsu bue mahue biame, Espíritu ja ecuana etsahuatani Diosu emitsu puji. Tueda ecuana sa muesumu su yani. Tuahueda quitaita Diosu ebajatani ecuaneseda puji. Mimi mahue janasiati neje bahui Diosu ebajatani ecuaneseda puji, muesumu su yani putsu. <sup>27</sup> Beju Tata Diosu ja pamapa ecuana sa piba cuana eshanapatani. Daja huecha Espíritu Santo sa janasiati jabajati cuana eshanapaenitani. Tueda Espíritu Santo ja ecuaneseda puji Tata Diosu ebajatani, cuaja tusa tsada epuani batame.

*Cristo ja ecuana epishitiametsahuatani*

<sup>28</sup> Edue cuana, bahue ecuaneda pamapa cuaja ecuana epuani cuana ecuaneseda puji saida epu,

ecuaneda Diusu ibuneda ebainia putsu, daja huecha tuahueda ecuana dharetana putsu mesa ai tsada cuana ya puji. <sup>29</sup> Beju pamapa ai cuana epupiruji su, Diusu bahue puidha aidhe cuana tu peje su jei eputa. Cuaja mesa ebacua Jesucristo nime paputa puji dharetaidha huecuana. Cristo da Diusu sa equene Ebacua. Tije beju tu peje su jei eputani cuana Cristo nime Diusu ja ebacua cuana yatayu. <sup>30</sup> Beju tueda mesa dharejiji cuana Diusu ja ihuatana tu peje su jei paputa huecuana puji. Da su jei putana su, batsutana huecuana, nimebutsepia putsu. Huaraji aida, tucheda yata huecuana, mesa ebacua cuana putsu.

<sup>31</sup> Edue cuana, mepibaenique tueda ai saida cuana. Diusu ecuana neje yani putsu, ¿aiya biame detse ecuana pishitiameta cua? <sup>32</sup> Diusu ja ecuaneseda puji mesa piada quita ebacua emanu puji menajatiatana putsu, ¿aimue jia maida ecuana pamapa ai saida cuana etiata mahue? <sup>33</sup> Aimue detse aiya biame Diusu sa dharejiji cuana tu-aquisata cua mahue, Diusu ja nimebutsepi atana huecuana putsu. <sup>34</sup> Aimue detse aiya biame matseta cua huecuana mahue, Cristo tuneseda puji manuana putsu. Manu putsu, manujiji cuana duju jenetia netianaibana. Jiahue cielo su Tata Diusu sa bai eni bene yani. Dapia tuahueda Tata Diusu ebajatani mesa dharejiji cuana sa puji. <sup>35</sup> Cristo ja ecuana ebia su ibuneda ebatani. Ahua ecuaneda sufri epu, enime cuana ecuana sa paani, ecuana tijetije paata huecuana, ai dia taji ecuana sa pahueiti, daja huecha ejud'uji pahueiti, rejada su ecuaneda papuniuneti, ecuana manuameja paata huecuana, bahue ecuaneda tueda ai cuana

su ecuaneda sufri papu biame, Cristo ja ecuana daja hue ibuneda ebaderata. <sup>36</sup> Uja derejiji yani tueda ai cuana jepuiti:

Mi jepuiti pamapa tsine ecuanaju manu su hue epuani.

Ecuanaju da emanuame puji huisha cuana nime.

<sup>37</sup> Cristo ja ecuana etsahuata pamapa tueda ai cuana epishitiame puji, ecuana ebia su ibuneda ebatani putsu. <sup>38-39</sup> Bahue saida ema Diosu ja ecuana daja hue ibuneda ebaderata. Ecuaneda eid'e ahua emanu su, aimue Diosu ja ecuana ibuneda ebarijita mahue. Aimue ángel, einid'u tucheda cuana, jiahue ejaitianani ai cuana, daja huecha epusiu ai cuana, baqui bauda, dueda eni su ai cuana, pia ai papu, tueda ai cuana ja Diosu sa ecuana neje jaibunebati cuana arijiameta cua mahue, ecuaneda Cristo neje dunejiji yani putsu.

## 9

### *Diosu ja judío cuana dharetaidha*

<sup>1</sup> Edue cuana, Cristo bahue yama micuana butsepi equisainia. Daja huecha Espíritu Santo bahue aimue ema bid'umimi epuani mahue. <sup>2</sup> Pamapa hora su ebia su ema epibapibani judío cuana jepuiti. <sup>3</sup> Tsada quema pamapa tuneda Cristo peje su jei paputa puji. Ema quitaita detse jamenajatiati cua tuna sa eturuca matsejiji epu puji, d'ejisu paputa huecuana puji. Daja ema epu, tuneda quema judío edue cuana putsu. <sup>4</sup> Beju tuneda da judío cuana. Biahua tiempo Diosu ja dharetaidha



huecuana mesa dharejiji cristiano cuana paputa huecuana puji. Tuna peje su aida jabametidha. Tuna neje huamahuama jamitsuti jatiatitaidha huecuana. Mesa jacuatsasiati cuana tiataidha huecuana. Cuaja tu mitsutsuame buetsuataidha huecuana. Mesa jamitsuti saida tiataidha huecuana. <sup>5</sup> Abraham chenu sa ebacua cuana eputani huecuana. Cristo di judío deja bataji puina. Tueda da pamapa ai cuana sa huaraji aida, Diosu putsu. Pamapa cristiano cuana ja tueda pamitsutsuaenita. Daja papu.

<sup>6-7</sup> ¿Ai da Diosu ja mesa jamitsuti mue ape atana bata? Mesa jamitsuti cuana da mesa dharejiji cuana sa puji bahui. Aimue pamapa israelita cuana Diosu sa ene quita dharejiji cuana mahue, Abraham chenu sa familia jenetia biame. Biahua tiempo Diosu ja Abraham chenu uja quisataidha: “Mique ebacua Isaac jepuiti bahui mique ene quita familia chenu bataji eputa.” <sup>8</sup> Isaac da Abraham chenu sa ebacua bataji puidha, Diosu ja mesa jamitsuti tiataidha jepuiti. Daja huecha Diosu sa jamitsuti cuana su jei eputani cuana da Diosu sa ebacua cuana eputani. <sup>9</sup> Uja Diosu ja Abraham chenu jamitsuti tiataidha: “Sara sa nedaji pu taji tsine cuana beju su, ema esiapati.”

<sup>10</sup> Tueda ebacua Isaac banime puidha. Isaac Rebeca neje jahuanetidha su, pere mesa ebacua bataji puidha. Tuatseda Esaú, Jacob banime puidha. Esaú da equene bataji puidha. Tije puji Jacob. <sup>11-13</sup> Tuatseda bataji puji mahue su, Diosu ja Jacob dharetaidha tuseda puji. Aimue Esaú mu dhare tueda da edue edhi puji biame. ¿Jucuaja su jia Diosu ja daja dharetaidha? ¿Ai madhada

Esau ja ataidha bata? ¿Ai saida Jacob ja ataidha bata? Aimue detse daja pu cua mahue, ai mahue tsuhu puina tse putsu. Beju Diusu ja Jacob bahui dharetaidha, mesa tsada puidha putsu. Bataji puji mahue tse su, Diusu ja Rebeca uja ataidha: “Beju Jacob tije bataji epu biame, Esau da tusa emebajaji epu.” Beju uja deremetaidha Diusu ja mesa quirica su: “Yama Jacob ibuneda bana. Esau mu mahue.”

<sup>14</sup> ¿Ai daja ataidha putsu, Diusu butsepi mahue bata? Beju tuahueda cuaja mesa tsada mahui yatani. <sup>15</sup> Moisés chenu uja ataidha: “Quebata quema tsada epuani, beju tueda yama eibunebata.” <sup>16</sup> Da su Diusu sa tsada bahui putsu, cristiano cuana eibunebata. Aimue tuna sa tsada, ai saida ajiji cuana jepuiti eibunebata huecuana mahue. <sup>17</sup> Uja Diusu ja Egipto yahua sa echua puji ataidha: “Quema tucheda cristiano cuana ebani puji, yama mi echua puji ichana. Ai nimetiuda cuana neje yama mi butsepiameana jepuiti, cristiano cuana ja quema tucheda ba putsu, quema ebani di eshanapata huecuana.” <sup>18</sup> Da putsu, bahue ecuaneda Diusu ja cuaja mesa tsada epuani batame cristiano cuana yatani. Piada piada cuana eibunebatani. Pia cuana mu muesumu tadada yametani.

<sup>19</sup> Da su cuapuitime piada piada micuaneda uja pu cua: “¿Jucujaja su Diusu ja cristiano cuana ematsetani, tuahueda quitaita daja yametani huecuana putsu? Aimue detse aiya biame Diusu mimijeutsuta cua mahue.” <sup>20</sup> Be daja mepibatiji. Micuaneda cristiano cuana bahui putsu, aimue micuaneseda Diusu mimijeutsu taji mahue. ¿Ai

eicha jutu ja tu muduji, “¿Jucuaja su miada ema uja aitia?” yata bata? <sup>21</sup> Cujaja eicha jutu muduji sa tsada batame daja yatani. Ahua tuahueda rutu jenetia dhepe ania chidi misha bia su eicha puji aja su, daja da yata. Daja huecha ahua tueda rutu quitaita jenetia jutu ania chidi mahue cuati su eicha puji aja su, daja da yata. Cujaja mesa tsada batame, daja da yata.

<sup>22</sup> Diosu ja ai madhada yatani cuana paciencia aida neje tucheda putsu, ahua castigaja huecuana su, daja tucheda neje mesa castiga taji.

<sup>23</sup> Equene jenetia ecuana dharetaidha mesa jai-bunebati aida cuana ebameti puji. Ecuana da rutu jenetia dhepe ania ajiji nime. Diosu sa tsada tu neje cielo su yanieniti puji. <sup>24</sup> Edue cuana, ecuana da Diosu sa jadhareti cuana. Ecuana dharetana judío, judío mahue cuana duju jenetia tuseda puji. <sup>25</sup> Uja Diosu ja profeta Oseas chenu deremetaidha mesa quirica su:

Edhare yama pia cristiano cuana judío mahue cuana.

Quema dharejiji cuana putaina huecuana mahue biame, beju quema dharejiji cuana eputa.

Quema ibuneda putaina huecuana mahue biame, quema ibuneda cuana eputa.

<sup>26</sup> Judío eputani mahue huecuana biame, quema dharejiji cuana eputa.

<sup>27-28</sup> Beju profeta Isaías chenu ja uja deretaidha judío cuana jepuiti: “Judío cuana da ebia su dueji jutujutuji nime biame, quejucua chidi hue tuneda d'eji su eputa, Diosu ja jubida neje tipeida ecastigatayu huecuana putsu.” <sup>29</sup> Neicha uja Isaías chenu quitaita ja deretaidha judío cuana jepuiti:

Diusu tucheda ja aimue judío cuana manuamepetaidha mahue, cuaja Sodoma, Gomorra ejude detse su aniji cuana ataidha nime.

Mesa jaibunebati jepuiti piada piada judío cuana d'eji su ataidha.

*Judío cuana ja Cristo jepuiti quisa saida cuana tsada mahue batana*

<sup>30</sup> Edue cuana, bahue mepuenique, judío mahue cuana ja aimue Diusu chacutaina mahue biame, Diusu ja enimebutsepiata huecuana, ahua tu peje su enimetuheatita huecuana su. <sup>31</sup> Judío cuana mu nimebutsepi puja putana biame, mue teje atana huecuana, Diusu sa jacuatsasiati cuana bahui aja ataina huecuana putsu. Tueda jacuatsasiati cuana mue ape atana huecuana putsu, aimue nimebutsepi putana huecuana mahue. <sup>32</sup> Diusu peje su janimetuheatija mahue nimebutsepi epu puji. Jacuatsasiati cuana bahui a putsu, nimebutsepi puja epudhaatani huecuana. Da su epitsatitani huecuana. <sup>33</sup> Uja derejiji yani tuna jepuiti Diusu sa quirica su:

Yama Jerusalén ejude su Cristo huaraji eichati.

Tu jei aja mahue yatani cuana da deja yaseti je, tumu su jahuatsitud'iti putsu, eduininiani nime.

Daja Cristo neje eduininita huecuana, tu jei aja mahue putsu.

Daja biame, tu jei yatani cuana mu tuahueda ene quita d'eji su yaenitayu.

## 10

<sup>1</sup> Edue cuana, quema tsada pamapa judío cuana d'eji su paputa. Da puji yama Diosu jubida eba-jainia pamapa hora su. <sup>2-3</sup> Bahue ema Diosu ebia su mebajaja yatani huecuana. Daja biame, cuaja Diosu ja cristiano cuana enimbutsepiatani aimue eshanapatani huecuana mahue. Aimue Cristo peje su jei puja eputani huecuana mahue Diosu ja panimebutsepiata huecuana puji. Tuneda quitaita hue janimebutsepiatija, Diosu sa jacuatsasiati cuana bahui a putsu. <sup>4</sup> Cristo ja mu pamapa Moisés chenu sa jacuatsasiati cuana saida apetana putsu, aimue detse etse jacuatsasiati cuana a cua mahue nimebutsepi epu puji. Jiahue tu peje su jei pu putsu bahui, etse nimebutsepi pu cua.

<sup>5</sup> Edue cuana, biahua tiempo Moisés chenu ja uja deretaidha tueda ai cuana jepuiti: “Ahua quebata ja Diosu sa jacuatsasiati cuana aja yatani su, tueda pamapa quitana ape taji nimebutsepi epu puji.” <sup>6-7</sup> Beju jiahue yama micuana saida equisa. Atasaida nimebutsepi epu puji. Cristo peje su jei pu putsu bahui, micuaneda nimebutsepi pu cua. <sup>8</sup> Be daja hue ai saida cuana bahui aja meaderaji Cristo etejeti puji, tueda mu micuana naja su yani putsu. Diosu sa quisa saida cuana ecuanaju quisaquisa epuani su, jei pu putsu bahui, micuaneda nimebutsepi pu cua. <sup>9-10</sup> Uja ecuanaju quisaquisa epuani: Ahua quebata cristiano cuana butse su, “Cristo da quema Echua Puji”, epu su, ahua Diosu ja Cristo id'emetana jei epu su, da su tueda d'eji su epu. Daja huecha Diosu ja tueda enimebutsepiatayu.

<sup>11</sup> Uja Diosu sa quirica su derejiji yani: “Quebata

tu peje su jei epu su, ene quita d'eji su epueniyu.”  
<sup>12</sup> Beju Cristo ja judío, judío mahue cuana tupupai ebatani, tueda da pamapa sa Echua Puji aida putsu. Aiya papu tu ebajata su, tuahueda mesa jaibunebati cuana etiata. <sup>13</sup> Uja derejiji yani: “Pamapa Echua Puji sa ebani su Diusu ebajatani cuana Diusu ja d'eji su yata.” <sup>14</sup> Daja biame, ¿cuaja ni da Diusu bajame ata cua huecuana, Echua Puji Jesucristo peje su jei puji mahue putsu? Daja huecha, ¿cuaja ni da tu peje su jei pume puta cua huecuana, tusa quisa saida cuana id'abaji mahue putsu? <sup>15</sup> Daja huecha, ¿cuaja ni da aiya quisame ata cua huecuana, ahua Diusu ja mue beitu su? Uja Diusu sa quirica su derejiji yani: “Saida chidi Diusu sa quisaquisa puji cuana, Diusu sa quisa saida cuana quisaquisa eputaniuneti huecuana putsu.”

<sup>16</sup> Beju aimue pamapa jei putana mahue Diusu sa quisa saida cuana su. Profeta Isaías chenu ja uja Diusu ataidha tueda ai cuana jepuiti: “Echua Puji, ¿quejucua cuana ja bahui ema jei atana, mique quisa saida cuana quisaquisa puana su?” <sup>17</sup> Da su beju cristiano cuana sa jei epu puji equene Cristo sa quisa saida cuana id'aba taji.

<sup>18</sup> ¿Ai judío cuana ja Diusu sa quisa saida cuana mue id'aba bata?

Pamapa yahua je quepia tuna yanita je Diusu sa quisa saida cuana cuinatiana. <sup>19</sup> ¿Ai judío cuana ja Diusu sa quisa saida cuana mue shanapa bata? Biahua tiempo Moisés chenu ja Diusu sa quirica su deretaidha cuaja Diusu ja judío cuana ataidha. Uja

Diusu ja ataidha huecuana, jei aja mahue ataidha huecuana putsu:

Micuaneda envidia epu, yama pia judío mahue cristiano cuana micuana sa eturuca eibuneba su.

Ema eshanapatani huecuana biame, quema dharejiji cristiano quitaita cuana eputa huecuana micuana sa eturuca.

Yama micuana eduininiame tuna jepuiti.

<sup>20</sup> Daja huecha Isaías ja cuaja Diusu puidha uja deretaidha:

Judío mahue cuana ja ema mue chacu biame, ema tejetana huecuana.

Ema tuna peje su jabametiana, ema mue chacu huecuana biame.

<sup>21</sup> Cuaja neicha Diusu puidha judío cuana jepuiti Isajas ja deretaidha uja: “Judío cuana ja mu aimue ema jei aja atana mahue, yama pamapa tsine ibuneda neje ihuana huecuana biame. Japibatadadatitana huecuana ema neje.”

## 11

### *Quejucua hue judío cuana d'ejí su eputa*

<sup>1</sup> ¿Ai Diusu ja mesa judío cristiano cuana jusiaichaenitana bata? Mepibaque, ema quitaita judío deja epuani biame, Diusu ja ema d'ejí su atana. Tata Abraham chenu da quema tata chenu. Ema da Benjamín sa familia jenetia.

<sup>2</sup> Aimue Diusu ja mesa judío cristiano cuana jusiaichaenitana mahue, tuahueda equene su dharetaidha huecuana putsu. <sup>3</sup> Mepibaque profeta Elías chenu. Biahua tiempo tuahueda uja Diusu ataidha: “Echua Puji, ye judío cuana ja pamapa

mique pia profeta cuana manuametana. Pamapa mique altar cuana di dajajamepetana huecuana. Beju ema bahui eid'e yani. Jiahue ema macha echacutani huecuana emanuame puji.” <sup>4</sup> Da su Diusu ja tueda jeitsuataidha uja: “Beju quema mu yani siete mil deja cuana aimue Baal eimea mitsutsuajita mahue.” <sup>5</sup> Daja huecha jiahue tsine. Yani beju quejucua hue Diusu ja mesa jaibunebati jepuiti dharetana. <sup>6</sup> Da su bahue ecuaneda Diusu ja cristiano cuana edharetani mesa jaibunebati jepuiti bahui. Aimue mecuana sa ai saida ajiji cuana jepuiti edharetani huecuana mahue.

<sup>7</sup> Da su beju bahue ecuaneda aimue pamapa judío cuana ja Diusu tejetana mahue, Diusu ebia su chacutana huecuana biame. Quejucua cuana ja bahui Diusu tejetana. Pia cuana mu japibatadadatitana. <sup>8</sup> Uja derejiji yani Diusu sa quirica su tuna jepuiti: “Diusu ja tuna sa piba teritana pashanapata huecuana mahue puji. Jiahue teje daja hue eputani huecuana.” <sup>9</sup> Echua puji David chenu ja di uja deretaidha tuna jepuiti:

Tuneseda pamapa ai saida cuana yani putsu,  
Diusu neje saida yani pepe eputani huecuana.

Daja hue pabaseaderatita huecuana.

Castigajiji paputa huecuana.

<sup>10</sup> Chamatani, eid'abatani huecuana biame, be pashanapata huecuana.

Mecuana sa sufrimiento cuana pupe bue mahue papu.

*Judío mahue cuana Diusu ja d'ejí su atana*

<sup>11</sup> Edue cuana, aimue Diusu ja mesa judío cristiano cuana jusiaichaenitana mahue. Aimue



dajajapetana huecuana mahue. Diusu jei aja mahue atana huecuana putsu, Diusu ja pamapa yahua cuana su aniji cristiano cuana eihuatani tu peje su jei paputa huecuana puji. Daja Diusu ja atana judío cristiano cuana tu peje su neicha pasiapatita huecuana puji, envidia pu putsu. <sup>12</sup> Diusu ja pamapa yahua su aniji cristiano cuana mesa quisa saida cuana quisamepiru putsu, eibunebatani huecuana judío cuana ja jei aja mahue atana putsu. Daja biame, pamapa judío cuana Diusu jei yata su, tuna jepuiti pamapa ye mundo su aniji cristiano cuana Diusu ja ebia su eibunebatayu, judío cuana Diusu jei atana putsu.

<sup>13</sup> Edue cuana, micuaneda da judío mahue cuana putsu, yama micuana saida pibameja yainia, Diusu ja ema micuana peje su beitutana mesa quisa saida cuana quisaquisa epu puji. <sup>14</sup> Daja yama yainia ba putsu, cuapuitime tuneda di d'ejí su puta cua Cristo peje su jei pu putsu, Diusu ja judío mahue cuana ebia su ibuneda ebatani bahue pu putsu. <sup>15</sup> Judío cuana ja Diusu jei aja mahue atana putsu, Diusu ja pamapa pia judío mahue cristiano cuana ihuatana tu peje su jei pu putsu, d'ejí su paputa huecuana puji. Da su judío cuana Cristo peje su jei eputa su, Diusu ja pamapa ye mundo su aniji cristiano cuana ebia su eibunebatayu. Tuneda emanu Diusu ja eid'e ametayu cua pu cua nime. <sup>16</sup> Equene Diusu ja Abraham chenu, tata chenu cuana dharetaidha. Da su pamapa tuna tije judío cuana di tuna nime Diusu sa dharejiji cuana eputa. Tueda da equi saida nime. Abraham chenu, tata chenu cuana da ed'au nime. Tije judío cuana equi nime. Ahua

equi sa ed'au saida su, pamapa echa cuana di saida eputa.

<sup>17</sup> Beju judío cuana da echa cuana pu cua nime. Piada piada cuana Diusu ja dheutana, tu peje su jei puja mahue putana huecuana putsu. Micuaneda da pia echa cuana pu cua nime, judío mahue putsu. Diusu ja micuana tueda tu dheutana echa cuana sa eti jude su eturuca ribaichatana pu cua nime. Beju jahue Diusu ja micuana judío cuana neje dunemetana. Da su pamapa Diusu sa tuneseda puji ai saida cuana micuaneseda di.

<sup>18</sup> Da putsu, be ebia su aida mebatiji pia judío echa nime dheutana cuana neje. Mepibaenitique, micuaneda da echa nime hue. Aimue micuaneda ed'au nime mahue. Ed'au ja echa cuana ebia su aida a putsu, eid'e yametani.

<sup>19</sup> Cuapuitime micuaneda ebia su aida jabati cua, Diusu ja micuana judío cuana sa eturuca ribaichatana putsu. <sup>20</sup> Beju Diusu ja dheutana huecuana, aimue tu peje su jei putana mahue putsu. Micuaneda ribaichatana tuna sa eturuca, micuaneda tu peje su jei puana putsu. Da putsu, nimemitsida mepuque Diusu peje su. Be ebia su aida mebatiji. <sup>21</sup> Cuaja Diusu ja judío cuana dheutana nime, daja huecha micuaneda di dheuta cua, ahua micuaneda tuna nime tu peje su jei puja mahue epu su. <sup>22</sup> Beju bahue ecuaneda Diusu da ebia su saida biame, tu jei aja mahue cuana jubida castiga bahue. Judío cuana jei puja mahue putana putsu, Diusu ja dheutana huecuana. Micuana neje mu ebia su saida puana, micuaneda tu peje su jei puana putsu. Ahua micuaneda Diusu peje su jei puderaja mahue

su, tuahueda micuaneda di edheutayu. <sup>23</sup> Daja huecha dheutana judío cuana Diusu ja neicha ribaichatayu cua, ahua neicha tu peje su jei eputa huecuana su. Daja ata cua Diusu ja, tuseda puji mu aimue ai biame atadhada mahue putsu. <sup>24</sup> Beju micuana batsutana tu neje dunejiji yaniti puji, aimue micuaneda tusa jadhareti judío cristiano cuana puana biame. Daja huecha dheutana judío cuana neicha eribaichatayu tuna sa equene eti jude su paanititayu huecuana puji.

*Judío cuana di Diusu ja d'ejí su yatayu, judío mahue cuana sa jei pu taji tiempo epupe su*

<sup>25</sup> Edue cuana, be ebia su aida mebatiji. Bahue mepuque ye etsia quisa cuana: Judío cuana da quejucua tiempo puji aimue Cristo peje su jei eputani mahue judío mahue cuana sa jei pu taji tiempo epupe teje. <sup>26</sup> Da su jei pu taji tiempo epupe su, Diusu ja pamapa judío cuana d'ejí su yatayu. Uja Diusu puidha mesa quirica su tueda ai cuana jepuiti:

Jerusalén ejude jenetia D'ejí su Jaatiji ja ecuatsasiata.

Pamapa judío cuana sa ai madhada cuana emejemipeta.

<sup>27</sup> Tuna sa jucha cuana mejemipe putsu, quema jamitsuti eichacua yama etiayu huecuana.

<sup>28</sup> Jiahue mu judío cuana ja Diusu sa quisa saida cuana tsada mahue ebatani. Da putsu, jiahue Diusu ja mesa quisa saida cuana judío mahue cuana peje su equisametani tu peje su jei paputa huecuana puji. Daja biame, Diusu ja judío cuana daja hue ibunebainiame yatani, Abraham chenu

peje jenetia huecuana putsu. <sup>29</sup> Beju Diusu ja pamapa mesa jamitsuti cuana yapetayu. Ai hora su biame judío cuana esetata mahue, Abraham chenu equene ihuataidha putsu. Judío cuana d'eji su ya jamitsuti tia putsu, daja yatayu huecuana. <sup>30</sup> Micuaneda equene Diusu jei aja mahue aina. Daja biame, jiahue Diusu ja micuana eibunibatani, judío cuana ja jei aja mahue atana putsu. <sup>31</sup> Daja huecha judío cuana ja Diusu jei aja mahue atana biame, Diusu ja neicha eibunibatayu huecuana, cuaja micuana jiahue eibunibatani nime. <sup>32</sup> Pamapa cristiano cuana a taji mahue Diusu ja batana putsu, ibunibatana huecuana.

<sup>33</sup> Beju Diusu da ebia su bahue eni. Pamapa ai cuana eshanapatani. Ecuanteda cuaja shanapa taji mahue mesa piba aida cuana. Tu yatani ai cuana ecuaneda cuaja shanapa taji mahue ebainia, tueda da ebia su aida putsu. <sup>34</sup> “¿Aidhe ni da bahue pu cua Diusu sa piba cuana? ¿Aiya ni da Diusu buetsuata cua? <sup>35-36</sup> Diusu sa mu aidhe sa jatsahuati tsada mahue. Aimue detse aiya biame ai tiata cua mahue Diusu tuahueda eturuca patiata puji, pamapa ai cuana tu peje jenetia putsu.” Pamapa ai cuana beju eid'e, yanita tusa tucheda su cama. Tuseda puji bahui pamapa ai cuana yani. ¡Gloria Tata Diusu papueni! Daja papu.

## 12

### *Cuaja Diusu sa dharejiji cuana puniuneti taji*

<sup>1</sup> Da su beju edue cuana, yama micuana jubida ebajainia daja hue memenajatiaderapetique Diusu peje su, tuahueda micuana ebia su

ibunebatana putsu. Micuana sa equita cuana tuseda puji saida, ichaderajiji papu. Daja a putsu, micuaneda Diusu beidaji yame. Daja micuaneseda pu taji Diusu emitsutsua puji. <sup>2</sup> Be ye mundo sa ai puiti madhada cuana su mepuniunetiji. Nimeeichacua mepuque, Diusu peje su japibaturucati putsu. Daja pu putsu, micuaneda eshanapa cuaja Diusu sa tsada ya puji. Daja huecha madhada ahua saida micuaneda eshanapa ai saida cuana bahui ya puji.

<sup>3</sup> Beju Diusu ja ema ebia su ibuneba putsu, ema mesa quisaquisa puji ichatana. Da putsu, yama micuana jubida equisainia be ebia su aida mebatiji, Diusu ja metse su hue micuana sa tupu mesa tucheda tiatana putsu. Piba butsepi neje mepibatique cuaja Diusu ja metse su hue micuana tiatana. <sup>4</sup> Pamapa ecuaneda piada equita nime, huamahuama dunejiji yani putsu. Equita sa pamapa tsapiapiati ai cuana yani. Yani equita sa ebai, eme, eid'aja, ehuaitsi, muesumu. Daja da equita sa dueji ai cuana yani. Pamapa sa tsapiapiati mudu cuana yani. <sup>5</sup> Daja huecha ecuaneda di, Cristo sa equita nime putsu. Metse su hue ecuaneseda tsapiapiati ai mudu yani biame, piada hue ecuaneda.

<sup>6</sup> Ecuana sa tupu teje Diusu ja ecuana tsapiapiati ai mudu cuana tiatana tu emebaja puji, cuaja mesa tsada epuani batame. Da putsu, tueda mudu quitaita cuana ecuaneseda saida a taji Diusu sa puji. Ahua quebata Diusu ja quisaquisa puji ichatana su, tu etiatani quisa saida cuana tuseda edue cuana saida quisaquisa a taji. <sup>7</sup> Ahua quebata Diusu ja ilisha sa emebajaji ichatana su,

tuseda puji saida pia cuana mebaja taji. Ahua quebata Diusu ja ebuetsuaji ichatana su, tuseda puji saida buetsua taji. <sup>8</sup> Ahua quebata Diusu ja pia cuana nimetucheameji ichatana su, daja saida paata. Chipilu etiatani cuana sa saida neje tia taji aimue eturuca einatsu puji mahue. Ehuidusuji cuana sa jarejati neje huidusu taji. Tsahuataja cuana etsahuaji cuana sa beidaji neje tsahua taji.

*Cuaja jei eputani cuana sa puniuneti taji*

<sup>9</sup> Edue cuana, huamahuama ibuneda mebaenitique. Be tsada mebaji ai madhada cuana. Ai saida cuana bahui meaque. <sup>10</sup> Edue quitaita nime huamahuama ibuneda mebatique. Meiyubatique huamahuama. Daja huecha huamahuama d'eji metiatique.

<sup>11</sup> Be tunada mepuji. Echua Puji Jesucristo jubida memebajaque muesumu beidaji neje.

<sup>12</sup> Beidaji mepuque, Diusu peje su ebia su enimeid'uatiani putsu. Micuana tijetije yatani huecuana su, metucheatique. Be Cristo tije mearijiji. Daja hue Diusu memitsuderaque.

<sup>13</sup> Tsahuataja edue cuana metsahuaque. Saida mebatsuque micuana sa ete su ecuinatani cuana.

<sup>14</sup> Meibunebaque micuana neje madhada eputani cuana. Diusu mebajaque paibunebata huecuana puji. Be mimi madhada metiaji huecuana.

<sup>15</sup> Beidaji mepuque beidaji eputani cuana neje tupupai. Daja huecha mepaque eputani cuana neje.

<sup>16</sup> Saida neje huamahuama meanique. Be ebia su aida mebatiji. Nimemitsida cuana neje tupupai mepuniunetique. Be ebia su bahue eni mabatiji.

<sup>17</sup> Ahua pia cuana ja micuana madhada hue yatani su, be micuaneda di eturuca daja madhada meaji. Saida, butsepi neje cristiano cuana butse su mepuniunetique. <sup>18</sup> Saida meanipad'iichaque pamapa cristiano cuana neje. <sup>19</sup> Edue ibuneda cuana, be eturuca mebiahuanatiji. Diusu sa bahui eturuca a taji. Uja Diusu puidha mesa quirica su: "Yama bahui ecastigayu. Daja huecha yama bahui eturuca yayu." <sup>20</sup> Neicha Diusu puidha uja: "Ahua mique majai edhemanuani su, mihuaque. Ahua jaid'itija su, id'imeque. Ahua daja saida miada ya su, tueda ebidhuame." <sup>21</sup> Be mepishitiametiji, ai madhada cuana eturuca a putsu. Ai madhada cuana mepishitiameque, ai saida cuana a putsu.

## 13

<sup>1</sup> Meiyubaque pamapa huaraji cuana, Diusu ja ichatana huecuana putsu. <sup>2</sup> Ahua quebata ja huaraji cuana jei aja mahue yatani su, tuahueda aimue Diusu jei aja mahue yatani pu cua nime, pamapa huaraji cuana Diusu ja ichatana putsu. Beju huaraji ja a taji mahue cuana bahui ecastigata. <sup>3</sup> Huaraji cuana da Diusu ja ejude inatsihuaji ichatana aimue saida yatani cuana iyuame yame puji mahue. Ai madhada yatani cuana bahui iyuame yame puji ichatana. Da putsu, ahua micuaneda ai saida cuana bahui ya su, aimue tuna neje eiyuati mahue. Ai saida micuaneda ya su, saida micuana etsabata huecuana. <sup>4</sup> Pamapa huaraji cuana da Diusu sa emebajaji cuana cristiano cuana einatsihua puji. Ahua micuaneda ai madhada cuana ya su, micuaneseda jaiyuati taji, huaraji cuana ja ene putsu ecastigata putsu.

Da puji Diusu ja huaraji cuana ichatana. <sup>5</sup> Da putsu, micuaneseda iyuba taji huecuana castigo einatsu puji mahue, daja huecha Diusu butse su saida, beidaji yaniti puji. <sup>6</sup> Da putsu, huaraji cuana micuaneseda tsahua taji, Diusu ja madhada aji cuana castigaji paputa puji ichatana huecuana putsu.

<sup>7</sup> Metse su hue mechujetiaque quejucua mecuana sa inatsu taji tupu. Quejucua jia micuaneseda chujetia taji tupu beju mechujetiaque huecuana. Quejucua jia micuaneseda echujebajaji chujetia taji metiaque. Pamapa ai iyuba taji cuana meiyubaque. Pamapa saida ba taji cuana saida mebaque. <sup>8</sup> Be manuji mepuji. Huamahuama ibuneda manuji bahui mepuque. Huamahuama saida, ibuneda jabati putsu, pamapa Diusu sa jacuatsasiati cuana yape. <sup>9</sup> Uja Diusu sa jacuatsasiati cuana puani: “Be pia sa ebutse neje jaquinatiji. Be jamanuametiji puji. Be tsi puji. Be bid'umimi puji. Be pia sa ai cuana utsatabaji.” Beju pamapa tueda Diusu sa jacuatsasiati cuana ecuaneda yape, ahua ecuaneda cristiano cuana ibuneda eba su. Echua Puji Jesucristo ja ecuanu uja buetsuatana: “Cuaja mida quitaita ibuneda ebatiani nime, daja mique pia cuana ibuneda ba taji.” <sup>10</sup> Ahua ecuaneda pia cuana ibuneda ebainia su, aimue ai madhada ya huecuana mahue. Da su beju ibuneda ba putsu, pamapa Diusu sa jacuatsasiati cuana yapeinia.

<sup>11</sup> Edue cuana, bahue mepuenique tiempo beju epupeni. Ejaitianani beju. Da su menimepiti-que Cristo quetsunu hue beju epue. Ecuaneda equene jei puana su, tueda ebia su nari beju.



<sup>12</sup> Dhidha epupecueni. Hueda beju enariatiani. Aimue ecuaneseda apuda su nime puniuneti taji mahue. Hueda su nime bahui mepuniunetija. Pamapa ai madhada cuana ecuaneseda ariji taji. <sup>13</sup> Ai saida cuana bahui ebia su paatija. Be tsetse aida mepuja. Be tsine ete id'apadada su mepuniunetija. Be deja, epuna cuana ja ai utsatada madhada cuana paata. Be meacuicuinatija. Be envidia neje mepuniunetija. <sup>14</sup> Be ebia su tsada mebaji ai utsatada madhada cuana. Echua Puji Jesucristo sa tucheda neje tueda ai madhada cuana mepishitiameque.

## 14

### *Be pia edue satsiaji*

<sup>1</sup> Quebata Cristo jepuiti Diusu sa ai cuana tupu shanapaji mahue edue saida mebatsuque. Be tu neje meacuicuinatiji yanacane ai cuana jepuiti. <sup>2</sup> Piada piada edue cuana Diusu sa ai cuana tupu shanapaji mahue putsu, bid'umimi diusu eimea cuana peje su irutsuajiji aicha diaja mahue yatani. Ahua tueda aicha micuaneseda puji mu saida edia puji su, be da jepuiti meacuicuinatiji Diusu sa ai cuana tupu shanapaji edue cuana neje. <sup>3</sup> Da su pamapa ai ediatani cuana ja irutsuajiji aicha diaja mahue edue cuana be ai eni mahue nime mebaji. Daja huecha aicha diaja mahue edue cuana sa aicha ediatani edue cuana satsia taji mahue, Diusu ja pamapa saida batsutana huecuana putsu. <sup>4</sup> ¿Ai da mida pia edue esatsia puji? Echua Puji ja bahui tueda cuatsasiata cua cuaja tuseda ani taji. Mesa tucheda neje tueda etsahuata butsepi papuniuneti puji.

<sup>5</sup> Daja huecha tsapiapiati piba cuana yani. Piada piada cuana ja piada tsine pia tsine ebia su aida ebatani edhitati puji. Pia cuana ja mu pamapa tsine cuana tupupai ebatani. Aimue pamapa su daja pibame cama mahue. Pamapa sa shanapaeni taji cuaja su daja jei eputani. <sup>6</sup> Ahua quebata ja piada tsine pia tsine ebia su aida ebatani su, Diusu sa puji daja yatani tu beidaji yame puji. Daja huecha quebata ja piada tsine pia tsine neje tupupai ebatani su, daja yatani Diusu beidaji yame puji. Ahua quebata ja aicha ediatani su, Diusu sa puji ediatani tu beidaji yame puji, diusulupai a putsu. Daja huecha ahua quebata ja aicha mue dia su, Diusu sa puji daja yatani tu beidaji yame puji. Da neje tuahueda di diusulupai Tata Diusu yatani pia cuana ja yatani nime.

<sup>7</sup> Beju pamapa ecuaneda yainia ai cuana da Diusu sa puji pu taji. Aimue ecuaneda sa tsada quitaita jepuiti puniuneti taji mahue. <sup>8</sup> Emanu ahua eid'e tuseda puji cama ecuaneda. <sup>9</sup> Beju Cristo manu putsu, id'eibana manujiji, daja huecha eid'e cuana sa Echua Puji epu puji.

<sup>10</sup> ¿Jucuaja su miada mique edue esatsiainia? ¿Jucuaja su miada tueda ai eni mahue nime ebainia? Cristo sa bahui ecuaneda juzga taji, tu butse su ecuaneda eneti su. <sup>11</sup> Beju uja derejiji yani Diusu sa quirica su:

Ene putsu, pamapa su ema butse su etururutayu. Pamapa ja, “Mida da ene quita Diusu”, ema yatayu.

<sup>12</sup> Da su beju pamapa ecuaneseda Diusu jeutsu taji cuaja ecuaneda ye mundo su anime puana.

*Be mique edue jucha ameji*

<sup>13</sup> Da putsu, huamahuama mesatsiarijitique. Be jucha meameji pia edue cuana, tuneda aja mahue yatani ai cuana tuna butse su a putsu.

<sup>14</sup> Ema da Echua Puji Jesucristo sa putsu, bahue ema aimue ai papu ja etse enid'umadhatani mahue. Daja biame, quebata tueda ai cuana ja etse enid'umadhatani epibatiani biame, ahua yata su, da su tueda enid'umadhatiani. Jucha yatani, tueda ai cuana tuseda puji saida mahue putsu. <sup>15</sup> Beju yama piada jabahuequisati etia. Bid'umimi diusu eimea peje su irutsuajiji aicha da saida edia puji. Aimue etse juchaji epuani mahue, dia putsu. Daja biame, ahua piada edue ja tueda ai aicha dia taji mahue epibatiani biame, ediata su, da su beju tueda juchaji epuani. Da putsu, be micuana sa Diusu sa ai cuana tupu shanapaji mahue edue cuana butse su tueda aicha mediaji. Ahua micuaneda edia su, micuana sa edue cuana enid'umadha. Beju aimue micuana sa edue cuana ibuneda ebameinia mahue. Da su be micuana sa tupu shanapaji mahue edue cuana menid'umadhaji, Cristo tuneseda puji di manua putsu. <sup>16</sup> Merejatique micuana sa ai jaati cuana neje, micuana neje aidhe biame pamimi mahue puji. <sup>17</sup> Beju aimue ecuaneseda ai biame a taji mahue diadia cuana neje Diusu beidaji yame puji. Diusu sa tsada bahui ecuaneda butsepi, nimepijajajiji, beidaji, Espíritu Santo neje epuni-uneti puji. <sup>18</sup> Quebata ja daja Cristo emebajata su, tuahueda Diusu beidaji yametayu. Daja huecha cristiano cuana neje tsabajiji epu.

<sup>19</sup> Da putsu, ai saida cuana bahui meaque

huamahuama saida, nimepijajiji yani puji. Met-sahuatique huamahuama daja hue Diusu saida eshanapaenidera puji. <sup>20</sup> Be Diusu ja ai saida yatani cuana metaitanameji, micuana sa ai tsada cuana bahui a putsu. Pamapa jana da saida edia puji biame, dia taji mahue, ahua pia edue sa jucha puji pu cua putsu. <sup>21</sup> Ahua micuana sa edue cuana enid'umadhatita, micuaneda tueda aicha ediainia, vino eid'inia ba putsu, ebia su saida tueda aicha edia mahue puji. Daja huecha vino. <sup>22</sup> Micuaneda jei epuani cuana da Diusu, micuaneda bahui bahue papu. Ahua quebata beta piba mahue neje ai papu yata su, ahua aimue juchaji ebatiani mahue su, da su tueda beidaji epu. Aimue jucha yatani mahue. <sup>23</sup> Ahua quebata mu beta piba neje ai papu yata su, ahua juchaji ebatiani su, da su tuahueda jucha yatani. Beju beta piba neje ajiji ai cuana da jucha.

## 15

### *Mique edue beidaji ame taji*

<sup>1</sup> Edue cuana, be ecuaneseda puji quitaita bahui meanija. Diusu sa ai cuana tupu eshanapatani edue cuana sa tupu shanapaji mahue edue cuana tsahua taji. <sup>2</sup> Pamapa ecuaneseda pia edue cuana sa saida puji a taji. Tsahua taji huecuana Diusu peje su jubida panimetuchteatita huecuana puji. <sup>3</sup> Cristo biame aimue mesa saida puji bahui ai cuana atana mahue. Ecuaneseda puji sufri puana. Uja Diusu sa quirica su derejiji yani tu jepuiti: "Tata, yama mique ai cuana bahui yainia putsu, mi madhabaji cuana ja ya

di madhabatana.” <sup>4</sup> Beju pamapa ai derejiji yani cuana da ecuana sa saida puji, daja huecha ebuetsuati puji. Tueda derejiji yani cuana ja ecuana pacienciaji yametani, mimiame putsu. Daja huecha ecuana Diusu peje su jubida enime-tuheatetani. <sup>5</sup> Da su beju Diusu ja paciencia metiataque. Menimetuheatetaque. Metsahu-ataque micuaneda huamahuama saida, ibuneda neje mebatique puji, cuaja Jesucristo ja ecuana buetsuatana batame. <sup>6</sup> Daja micuaneda saida jaba-ti putsu, pamapa micuaneda paije hue ecuana sa Echua Puji Jesucristo sa Tata Diusu emitsutsuayu.

*Pablo da judío mahue cuana peje su Diusu sa quisaquisa puji puana*

<sup>7</sup> Da su beju saida mebatsutique huamahuama, cuaja Cristo ja ecuana pamapa batsutana nime. Ahua daja micuaneda epu su, ene putsu Diusu emitsutsua. <sup>8</sup> Edua cuana, yama micuana butsepi equisainia, Cristo pueana judío cuana peje su tuna d'eji su ya puji, cuaja Diusu ja tuna sa tata chenu cuana mesa jamitsuti tiataidha batame. Beju jiahue Diusu ja mesa jamitsuti apetana ebametani, Cristo beitu putsu. <sup>9</sup> Daja huecha Cristo pueana judío mahue cuana di d'eji su ya puji mesa jai-bunebati cuana jepuiti, Diusu pamitsutsuata huecuana puji. Uja derejiji yani tueda ai cuana jepuiti: Da putsu, mi yama emitsutsua pamapa judío mahue cuana butse su.

Miqueda puji ema esatsu tuna butse su.

<sup>10</sup> Pia su neicha uja derejiji yani:

Judío, judío mahue cuana neje tupupai, beidaji mepuque.

11 Pia su neicha uja epuani:

Pamapa ejude cuana su aniji judío mahue cuana  
ja Diusu pamitsutsuata.

12 Uja Isaías deretaidha:

Isaí sa familia jenetia tueda epue.

Pamapa ejude cuana su aniji judío mahue cuana  
ecuatsasiatayu.

Tu peje su enimeid'uatitayu huecuana.

13 Diusu ja menimeid'uametaque. Nimepija-  
jame putsu, beidaji meametaque. Daja meataque,  
tu peje su jei puana putsu. Espíritu Santo ja met-  
sahuataque Diusu peje su jubida menimetuchea-  
tique puji.

14 Edue cuana, bahue ema micuaneda saida  
neje epuniunetiani. Diusu sa ai cuana jepuiti  
micuaneda tupu eshanapainia. Daja huecha  
micuaneda huamahuama saida quisaquisa jaati  
bahue. 15-16 Beju ye quirica su yama micuana ai  
cuana butsepi neje equisainia aimue micuaneda  
tipeida eseta mahue puji. Daja yama micuana  
butsepi neje equisainia, da puji ema Diusu ja  
huaratiatana putsu. Tuahueda ema ibunebatana  
putsu, ema mesa quisaquisa puji ichatana, judío  
mahue cuana peje su Cristo sa quisa saida cuana  
quisaquisa eputi puji, tuna d'eji su paputa puji. Da  
su Diusu ja tuneda di ebatsutayu, Espíritu Santo ja  
nimebutsepiatana huecuana putsu.

17 Ebia su beidaji ema, Diusu emebajainia putsu,  
aimue ema quema ai jaati cuana jepuiti emimi  
mahue. 18 Cristo ja ema yametani ai cuana bahui  
ema emimiani. Quema quisa, ai jaati cuana  
jepuiti, Diusu ja judío mahue cuana quisatana. Da  
neje jei putana huecuana. 19 Ai nimetiuda cuana

Espíritu Santo ja ema ametana mesa tucheda neje. Tueda ai cuana a putsu, Cristo jepuiti quisa saida cuana yama quitaneana pamapa ejude cuana je. Cristiano cuana d'ejí su puta cua, Cristo peje su jei pu putsu, ema quisaquisa puana. Daja ema quisaquisa puana Jerusalén ejude jenetia, Ilírico yahua teje. <sup>20</sup> Cristo shanapaji mahue ejude cuana su bahui ema cua putsu, Diosu sa quisa saida cuana quisaquisa puja puana. Putija mahue ema puana pia cuana quisaquisa putitana ejude je. <sup>21</sup> Uja derejiji yani Diosu sa quirica su tueda ai cuana jepuiti:

Quetsunu su biame tu jepuiti quisa cuana id'aba  
bue mahue cuana beju eid'abata.

Tu jepuiti eshanapatayu huecuana.

*Pablo Roma ejude su putija puana*

<sup>22</sup> Edue cuana, ema micuana peje su mue puti puana, ema putija puana biame, ejude meamea ema puniunetiana putsu. <sup>23</sup> Beju jiahue quema mudu tueda ejude cuana je apejiji. Da su jiahue ema micuana peje su eputi, cuaja equene quema tsada puana batame. <sup>24</sup> Ema España yahua su eputi su, yama micuana eperehuanana. Da su micuana neje quejucua tsine chidi ani putsu, tsada quema micuaneda ema saida, edid'i je puji ai cuana neje ebeitu ema, España yahua su ejaitiana su. <sup>25</sup> Beju jiahue mu tsuhu ema Jerusalén ejude su eputi. Edue cuana sa dhitajiji chipilu yama edusu dapia ejude su aniji edue cuana etsahua puji. <sup>26</sup> Macedonia, Acaya yahua detse su aniji edue cuana ja tueda chipilu dhitatana Jerusalén ejude su aniji edue puri cuana

etsahua puji. <sup>27</sup> Saida batana huecuana tueda chipilu ebeitu puji. Beju daja tuneseda a taji puana Jerusalén ejude su aniji edue cuana sa puji, tueda ejude jenetia Cristo jepuiti quisa saida cuana equene cuinanapiruana putsu. Jiahue beju tueda Macedonia, Acaya yahua detse su aniji edue cuana sa tsahua taji huecuana chipilu neje. <sup>28</sup> Da su Jerusalén ejude su aniji edue cuana yama chipilu tia putsu, micuana yama eperehuanana, España yahua su epuhu je. <sup>29</sup> Bahue ema Cristo ja ema mesa aida jaibunebati quisa etiata micuana sa saida puji yama equisa puji.

<sup>30</sup> Edue cuana, daja hue mebajaderaque Diusu quema puji. Daja yama micuana ebajainia Jesucristo da ecuana sa Echua Puji putsu, daja huecha Espíritu Santo ja ecuana ebia su ibuneda ebametani putsu. <sup>31</sup> Diusu jubida mebajaque tuahueda d'oji su ema paata Jerusalén ejude su aniji jei eputani mahue judío ate cuana peje jenetia. Mebajaque Diusu Jerusalén ejude su aniji edue cuana ja saida ye chipilu painatsuta puji. <sup>32</sup> Da su beju ahua Diusu sa tsada su, yama micuana beidaji neje eperehuanana huai chidi cama ejanahua puji. <sup>33</sup> Diusu ja menimepijajametaque. Daja papu.

## 16

### *Pablo ja edue cuana neje jamitsutibna*

<sup>1</sup> Edue cuana, saida mebatsuque edue epuna Febe. Tueda da Cencrea ejude jenetia. Tuahueda dapia ejude su aniji edue cuana saida mebajatana, ilisha sa emebajaji putsu. <sup>2</sup> Saida mabatsuque



tueda, Jesucristo peje su jei pujiji putsu. Met-sahuaque tueda pamapa mesa ai tsahuataji cuana su, tuahueda jucuada edue cuana ya di tsahuatana putsu. Daja ecuaneseda saida batsu taji pamapa Cristo jepuiti edue cuana.

<sup>3</sup> Memitsuque Priscila, Aquila detse. Tuatseda ema neje tupupai Jesucristo emebajatani. <sup>4</sup>Manu su hue puana tse ema d'oji su ya puji. Ema, pamapa edue judío mahue cuana neje diusulupai yainia tse. <sup>5</sup> Memitsuque Priscila, Aquila detse sa ete su ehitatitani edue cuana. Memitsuque quema ibuneda eshanapa Epeneto. Pamapa pia cuana equene tueda Cristo peje su jei puana Acaya yahua su. <sup>6</sup> Memitsuque María. Tuahueda micuana duju su Diusu jubida mebajatana. <sup>7</sup> Memitsuque quema Cristo jepuiti judío edue Andrónico, Junias detse. Tuatseda ema neje tupupai terijiji aniana. Ema equene Cristo peje su jei puana tse. Apóstol cuana ja quitaita eiyubatani tse.

<sup>8</sup> Memitsuque quema Cristo jepuiti eshanapa Amplias. <sup>9</sup> Memitsuque Urbano. Tueda da ecuana neje tupupai Cristo sa emebajaji. Ibuneda edue Estaquis memitsuque. <sup>10</sup> Memitsuque Apelles. Quejucua nuati biame tueda Cristo sa deja saida jabametiana. Aristóbulo sa familia cuana memitsuque. <sup>11</sup> Memitsuque quema Cristo jepuiti judío edue Herodión. Narciso sa familia cuana memitsuque. Cristo peje su jei putana huecuana pamapa. <sup>12</sup> Memitsuque Trifena, Trifosa detse. Saida Cristo emebajatani tse. Memitsuque ibuneda edue epuna Pérsida. Tuahueda di Echua Puji Jesucristo sa puji jubida mebajatana.

<sup>13</sup> Memitsuque Rufo, daja huecha mesa cuara. Rufo da Cristo peje su jei pujiji butsepi. Tusa cuara da quema cuara nime puina. <sup>14</sup> Memitsuque edue Asíncrito, Flegonte, Hermas, Patrobas, Hermes cuana. Pamapa tuna neje yanita edue cuana di memitsuque. <sup>15</sup> Memitsuque Filólogo, Julia, Nereo cuana. Nereo sa dudu, Olimpás detse memitsuque. Memitsuque pamapa tuatse neje yanita Cristo jepuiti edue cuana.

<sup>16</sup> Huamahuama ibuneda neje memitsutique. Pamapa upia ejude su aniji edue cuana ja micuana emitsuametani.

<sup>17</sup> Mebaenitique jasajasajatiji cuana neje. Aimue micuaneda mu da puji jabuetsuatiana mahue. <sup>18</sup> Menetideraque tuna peje jenetia, ecuana sa Echua Puji Jesucristo aimue emebajatani huecuana mahue putsu. Tuna sa ai utsatada madhada cuana quitaita sa eme su bahui yanita huecuana. Ania mimi cuana neje ai papu su jei eputani cristiano cuana ebaseatani huecuana. <sup>19</sup> Pamapa su bahueta cuaja micuaneda Cristo jei yainia. Da putsu, ema beidaji. Quema tsada micuaneda ai saida cuana bahui meanique puji, aimue ai madhada cuana ya puji mahue. <sup>20</sup> Da su Diosu janimepijajametiji ja micuaneda Ishahua epishitiamemetayu. Ecuana sa Echua Puji Jesucristo ja meibunebataque.

<sup>21</sup> Timoteo ja micuana emitsuametani. Tueda da ema neje tupupai Cristo sa emebajaji. Quema Cristo jepuiti judío edue Lucio, Jasón, Sosípater cuana ja di micuana emitsuametani.

<sup>22</sup> (Ema da Tercio, Pablo sa quirica dereji. Yama di micuana emitsuameinia Echua Puji Jesucristo sa ebani su.)

<sup>23</sup> Ema da Pablo. Gayo sa ete su yani. Gayo ja micuana emitsuametani. Daja huecha pamapa tusa ete su edhitatitani edue cuana ja. Erasto ja micuana emitsuametani. Tueda da ejude sa chipilu quinaji epuani. Tije puji, edue Cuarto ja di micuana emitsuametani.

<sup>24</sup> Echua Puji Jesucristo ja meibunebataque. Daja papu.

*Tije quisa cuana*

<sup>25</sup> Beju pamitsutsuatija Diusu. Tuahueda micuana ebia su nimetucheda yametau Jesucristo peje su. Daja yama cristiano cuana equisainia, cuaja Diusu ja ema quisatana batame. Beju tueda Cristo jepuiti quisa saida cuana aimue Diusu ja biahua tiempo cristiano cuana quisataidha mahue. Ye mundo ai mahue jenetia, tueda quisa saida cuana Diusu sa enime su ichasetajiji quinatina. <sup>26</sup> Biahua tiempo profeta chenu cuana ja chu tueda quisa saida cuana derepirutaidha Diusu sa quirica su. Jiahue mu beju ecuanaju pamapa cristiano cuana peje su tueda quisa saida cuana quisaquisa epuani Cristo peje su jei paputa huecuana puji. Daja yama yainia, cuaja eid'e eni Diusu ja cuatsasiatana batame.

<sup>27</sup> Piada quita bahue eni Diusu pamitsutsuaenitija Jesucristo jepuiti. Daja papu.

**Diusu sa mimi**  
**New Testament in Tacana (BL:tna:Tacana)**

copyright © 2009 Wycliffe Bible Translators, Inc.

Language: Tacana

Translation by: Wycliffe Bible Translators, Inc.

Tacana [tna], Bolivia

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Tacana

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files  
dated 29 Jan 2022  
d0732984-534c-583e-85d6-df2586e256b7